



# JORNAL

## do

# Parlamento Nacional

VI LEGISLATURA

2.ª SESSÃO LEGISLATIVA (2023-2028)

## REUNIÃO PLENÁRIA DE 7 DE JANEIRO DE 2025

**Presidente:** Ex.<sup>ma</sup> Sr.<sup>a</sup> Maria Terezinha da Silva Viegas

**Vice-Presidentes:** Ex.<sup>mo</sup> Sr.

**Secretária:** Ex.<sup>ma</sup> Sr.<sup>a</sup> Virgínia Ana Belo

**Vice-Secretárias:** Ex.<sup>ma</sup> Sr.<sup>a</sup>

## SUMÁRIO

Sr.<sup>a</sup> Presidente em exercício, Maria Teresinha da Silva Viegas, declara aberta sessão plenária ne'e iha tuku 9 liu minuto 21, dadeer no halo leitura ba agenda de trabalho loron ne'e nian.

Liutiha ida-ne'e, Sr.<sup>a</sup> Presidente convida hotu-hotu hamriik ba execução Hino Nacional, Pátria, no Um Minuto de Silêncio.

**Antes Ordem do Dia** – Sr. Secretária da Mesa lê carta justificação falta Sr. Deputado Aniceto Longuinhos Guterres Lopes (FRETILIN) nian.

Iha biban tuirmai Bancada FRETILIN, representa husi Sr. Deputado José da Cruz, hato'o declaração política, hodi solidariza ho povo afetado sira husi evicção forçada iha Fomento II no iha Bidau.

Iha intervenção oin-oin, Sr.<sup>a</sup> Deputada no Sr. Deputado sira aborda kona-ba: cidadão chinesa balu ne'ebé halo tratamento saúde iha HNGV; informação kona-ba moras foun ne'ebé começa tama Timor; inundação iha Hera no necessidade atu tau atenção ba infraestrutura pública balu iha-ne'ebá; animal estraga comunidade nia ai-han iha to'os iha Hera; demora iha distribuição pacote orçamental 2025 nian ba linha ministerial sira; sistema *Free Balance* no Portal de Transparência ne'ebé la atualiza informação kona-ba execução OGE; circulação ema moras mental sira-nian iha Dili laran; pesquisa kona-ba hahán importado sira ne'ebé contém formalina; serbisu Secretário Estado SEATOU nian liga ba evicção no despejo administrativo; falta alojamento ba comunidade afetada husi evicção; atuação membro polícia balun nian ne'ebé la tuir regra Same Dotik; estrada aat iha Aldeia Cai-Cassa, Suco Gugleur Posto Maubara nian; condição estrada aat iha suco Hatulia Vila nune'e; impacto husi inundação iha Suco Hera; mota ne'ebé estraga comunidade sira-nia to'os no fahi-luhan iha Hera; preocupação comunidade sira-nian kona-ba falta acesso ba luz elétrica; karau estraga comunidade sira-nia ai-han iha Hera; engarrafamento iha cidade Díli; necessidade atu organiza didi'ak trânsito iha cemitério público Bekasi; corrupção ne'ebé buras iha Nação Timor-Leste; ordenamento cidade Díli nian; número mortalidade ne'ebé aas; qualidade atendimento iha HNGV no posto saúde sira iha nível nacional no municipal; evicção no despejo administrativo ne'ebé la favorece ba comunidade afetado; demoro iha construção estrada iha município Baucau; qualidade husi estrada ne'ebé companhia internacional Norinco constrói; polémica liga ho integração suco Abafala no suco Waitame nian ba posto administrativo foun; atraso iha pagamento subsídio ba funcionário destacado DNTT nian iha fronteira; falta regulação ba cidadão

hirak ne'ebé halo uma iha rai Estado nian; fechamento escola secundária iha Viqueque; condição aat escola pré-secundária iha Nahareka nian; carácter emergência husi projeto construção ponte Welolo; ponte kotu iha Lacluta; possibilidade IX Governo Constitucional no Governo australiano desenvolve *Greater Sunrise*; atraso iha implementação programa merenda escolar; falta cemitério próprio ba PNTL; tráfego iha estrada besik cemitério Bekasi; trânsito desorganizado iha rotunda Elemloi no cruzamento Ai-Mutin; possibilidade fó indemnização ba comunidade afetada sira husi evicção; horário no destino husi voo doméstico avião Aero Dili nian; organização evento nacional hirak ne'ebé realiza iha tinan 2024 nia rohan iha Oe-Cusse; comunidade afetada husi desastres naturais seidauk hetan apoio; falta alojamento ba família balu ne'ebé afetado husi evicção iha Bidau Santa Ana; ponte aat iha Aldeia Turo, Suco Babulu nune'e mós iha Abatu, Suco Letefoho; causa principal husi população ocupa espaço público no indevido iha capital Dili. Ikusmai Sr. Vice-Ministro dos Assuntos Parlamentares Adérito Hugo da Costa, hatán ba Deputado sira-nia husun no preocupação.

**Ordem do Dia** – Aprovação das Edições do *Jornal do Parlamento Nacional*, I Série-A, n.º 1, 2 e 3, datada de 22, 26 e 27 de junho de 2023.

Sr. Deputado sira ne'ebé intervém mak: Maria Teresa da Silva Gusmão (PD), Olinda Guterres (KHUNTO), Duarte Nunes no Gabriel Soares (CNRT), José da Cruz (FRETILIN), Natalino dos Santos Nascimento, Marcos Soares Martins, Veneranda E. M. Lemos Martins, Firmínio Taequi, Marcos Xavier no Lúcia Taeki (CNRT), Luís Roberto da Silva (KHUNTO), Antoninho Bianco (FRETILIN), Sancha Margarida Tilman (PD), Duarte Nunes (CNRT), Abel dos Santos (PLP), Florentino Ximenes da Costa «Sinarai» (FRETILIN).

*Sr.<sup>a</sup> Presidente taka sessão plenária ne'e iha  
tuku 11 liu minuto 53 dadeer.*

Sr.<sup>a</sup> **Presidente** (Maria Terezinha da Silva Viegas): — Mai ita hahú ita Plenária ba loron ohin nian. Bom dia ba Sr. Secretário-Geral, Adjunto no ba funcionário tomak.

*Horas hatudu tuku 9 liu minuto 21.*

Dala ida tan, bom dia ba Distinto Deputado sira hotu.

Molok atu hahú ita-nia Plenária ba primeiro dia do mês e do ano, «Agenda n.º 125/VI(2.<sup>a</sup>) – reunião do Plenário de terça-feira, 7 de janeiro de 2025.

Abertura

Execução do Hino Nacional.

Período de Antes Ordem Dia:

1. Justificação de falta do Sr. Deputado Aniceto Longuinhas Guterres Lopes;
2. Informação sobre visita privada de Sua Excelência o Presidente da República à Indonésia;
3. Distribuição e apreciação do Relatório de Fiscalização da Comissão de Educação, Juventude, Cultura e Cidadania aos municípios de Ainaro, Manatuto, Covalima e Lautém;
4. Distribuição e apreciação do Relatório de Fiscalização da Comissão de Infraestruturas aos municípios de Díli, Bobonaro e Manatuto;
5. Declarações políticas das bancadas parlamentares;
6. Intervenções diversas dos Srs. Deputados;
7. Intervenção do Sr. Vice-Ministro dos Assuntos Parlamentares sobre questões suscitadas pelos Srs. Deputados.

Período da Ordem do Dia:

Voto de pesar pelo falecimento do Tom Hyland».

Ho nune'e, molok ita atu fó abertura ba ita-nia Plenária ohin nian, ita hotu-hotu hamriik hodi hala'o execução ba Hino Nacional.

*Hotu-hotu hamriik hodi hananu Hino Nacional, Pátria.*

Molok hahú ita-nia trabalho ba loron ohin nian, antes de tudo, mai ita hotu hakru'uk hodi presta homenagem ba ita-nia herói no mártir da Pátria sira hotu ne'ebé fó vida ba soi ukun-an ida-ne'e.

Ho nune'e ita hakru'uk.

Um minuto de silêncio hahú.

*Hotu-hotu hamriik nafatin hodi haru'uk atu fó homenagem ba herói no mártir da Pátria sira.*

Um minuto de silêncio remata.

Halo favor, hotu-hotu tuur filafali.

Ho nune'e, ha'u husu ba Secretário-Geral ho funcionário sira hotu bele fila hikas ba hala'ó sira-nia serbisu. Mas, antes de tudo ha'u, hakarak hato'o ha'u-nia votos de boas festas e boas entradas do Ano Novo de 2025, atu nune'e bele hetan matak-malirin ba ita-nia serviço loroloron nian, liuliu ba bem-estar do povo e do País.

No mós desejo votos de boas entradas do Ano Novo ba distinto Deputado sira hotu, ba bancadas parlamentares no ba povo Timor-Leste tomak, atu ita hahú ita-nia tinan foun ida-ne'e ho ksolok, dame, domin ho perdão ba malu.

Husu ba Secretário-Geral no funcionário sira bele fila hikas ba Ita-Boot sira-nia fatin hodi bele hala'ó serbisu.

Molok atu hahú, ha'u husu ba bancada parlamentar sira, karik balu iha declaração política, se faz favor. Karik la iha, ita mantém ho agenda como está.

**Sr. Aniceto Longuinhos Guterres Lopes** (FRETILIN): — Sim, Sr.<sup>a</sup> Presidente, atu regista declaração política Bancada FRETILIN nian.

**Sr.<sup>a</sup> Presidente** (Maria Terezinha da Silva Viegas): — Bancada PLP, KHUNTO, CNRT e PD, não há mais declarações políticas?

Se assim for, ita tama ba primeira agenda, justificação de faltas.

Sr.<sup>a</sup> Secretária, se faz favor.

**Sr.<sup>a</sup> Secretária da Mesa** (Virgínia Ana Belo): — Obrigada, Sr.<sup>a</sup> Presidente em exercício.

Bom dia ba Ita-Boot, ba colega Deputado sira hotu no mós ba audiência.

«Requerimento de justificação de falta

Ex.<sup>ma</sup> Sr.<sup>a</sup> Presidente do Parlamento Nacional,

Aniceto Longuinhos Guterres Lopes, Deputado ao Parlamento Nacional, pertencente à Bancada da FRETILIN, vem requerer a Vossa Excelência que se digne considerar justificada a falta dada à reunião do Plenário no dia 9 de dezembro de 2024, por motivo de tratamento de saúde.

O Deputado,  
Aniceto Guterres».

Sr.<sup>a</sup> **Presidente** (Maria Terezinha da Silva Viegas): — Tuirmai – agenda n.º 1 já foi realizada – apenas informa de'it ba distinto Deputado sira katak iha agenda n.º 2, Presidente hala'ó tiha ona ninia viagem ba Indonésia iha dia 3 e fila hikas iha dia 4 ne'e. Ho nune'e, ba agenda n.º 3 e 4, já estão todas na mesa dos distintos Deputados.

Ita tama ba agenda n.º 5, declaração política da Bancada Parlamentar da FRETILIN.  
Tempo Ita-Boot nian, se faz favor.

Sr. **José da Cruz** (FRETILIN): — Obrigado, Sr.<sup>a</sup> Presidente.

«Ha'u-nia bom dia ba Sr.<sup>a</sup> Presidente do Parlamento em exercício, colega Deputado no Deputada sira. Bom dia mós ba Sr. Vice-Ministro dos Assuntos Parlamentares, camaradas Buiberes no Mauberres.

Lori Bancada FRETILIN nia naran, ha'u hakarak hato'ó boas estradas ba Tinan Foun 2025, hein katak tinan ida-ne'e sei lori buat foun ruma mai ita-nia Rain, liuliu ba povo ki'ik sira-nia moris.

Passagem tinan 2024 ba 2025 lori ksolok ba ema balu, maibé ema balu simu Tinan Foun ho matan-been tanba lakon sira-nia hela-fatin ne'ebé sira harii ho sira-nia kosar-been rasik.

Ba População sira iha Díli laran, liuliu sira ne'ebé hela iha Fomento II, Comoro, FRETILIN hato'o nia solidariedade no empatia ba evicção forçada ne'ebe hala'ó husi IX Governo ba sira-nia hela-fatin.

FRETILIN lamenta no condena tebes atuação Governo nian hodi halo evicção forçada ba população iha Fomento II laho condição ruma. Husik de'it afetado sira iha-ne'ebá, hafoin sobu hotu sira-nia uma, sira rasik la hatene atu bá ne'ebé. Hahalok sira hanesan ne'e uluk povo ida-ne'e experimenta ona iha ukun sira ditadura nian, ohin loron experimenta tan fali iha rai ida livre, independente no democrático.

Povo ida-ne'e luta no conquista vitória independência ida-ne'e tanba hakarak hari Estado ida-ne'ebé bele protege no respeita sira-nia direito atu moris no assegura futuro ida-ne'ebé nabilan ba sira, ba sira-nia oan no bei-oan sira-nia moris. Sira hakarak Estado ida-ne'ebé hatene sira-nia sofrimento, sira-nia mehi no sira-nia hakarak.

Infelizmente, saida mak acontece ikus-ikus ne'e contrário filafali ho saida mak povo ida-ne'e uluk hakarak no mehi atu hetan iha nia Estado ida-ne'ebe sira rasik harii ho sira-nia raan, kosar-been no

sacrifício sira. Estado ida-ne'e usa nia força polícia no militar sira hodi dudu, duni no halakon povo sira-nia direito atu hetan uma, livre circulação iha território tomak RDTL nian no mós iha direito ba hala'o ninia atividade económica.

Excelência sira,

Iha discurso político hotu-hotu Governo nian no ita hotu nian mak combate kiak no mukit ka hasai povo husi kiak no mukit. Saida mak ita haree durante ne'e, medida sira ne'ebé IX Governo foti hodi organiza cidade capital, contrário tomak ho discurso no promessa sira iha campanha política. Karik Governo confunde entre combate kiak ho combate ema kiak.

Bainhira ita dehan combate kiak ka hasai povo husi kiak no mukit, significa identifica causa tanbasá mak povo moris iha kiak nian laran, tanbasá população tem que mai hotu Díli atu buka moris iha mota no dalan ninin sira. Buka nia causa no resolve liuhosi plano no investimento sira, nune'e bele beneficia povo no muda povo nia situação sócio-económica hodi sai husi kiak. Maibé, ita haree, Governo tenta buka dalan fácil ka karik confusão duni, confunde fali combate kiak ho combate ema kiak, confunde liafuan hasai povo husi kiak ho hasai povo kiak husi cidade.

FRETILIN fó-hanoin filafali ba ita hotu katak objetivo husi luta ba ukun rasik-an la'ós harii cidade maibé atu kore povo husi kiak no mukit, harii ka desenvolve cidade sai hanesan instrumento ida atu dada sai povo husi nia situação sócio-económica ida kiak no mukit, tanba dignidade nação ida nian haree husi nia povo nia moris, la'ós cidade nia furak de'it.

Estado, liuhosi Governo, haluha nia obrigação constitucional hodi la fornece uma no hela-fatin ida-ne'ebé digno no di'ak liu ba nia cidadão sira. Povo sira-ne'ebe hela iha ponte okos, hela iha mota-ninin, ne'e cidadão RDTL ne'ebe loloos mós hetan proteção husi Governo.

Iha Constituição RDTL, artigo 58.º, hatete momoos kona-ba «Ema hotu iha direito ba nia an, nia família atu iha uma ida ho nia dimensão no condição di'ak, moos no conforto atubele iha intimidade ba ema ida-idak no privacidade familiar».

Pior liután mak Governo ho aproximação autoritária hodi husu cidadão sira-ne'ebe hetan evicção atu fila ba sira-nia município ida-idak. Ne'e forma de discriminação hasoru nia cidadão kiak sira ne'ebe buka hela moris iha cidade Díli. Prática ida-ne'e viola Constituição, artigo 44.º, kona-ba livre circulação, katak «cidadão hotu-hotu iha direito atu bá-mai no hetan nia hela-fatin iha território nacional nia laran».

Maluk timoroan sira,

FRETILIN concordada katak cidade capital Díli precisa hadi'a no hamoos, maibé la concordada atu hamoos fali povo husi cidade. Precisa iha mediada sira ne'ebe bele mitiga risco ba afetado sira. Oinsá ho sira-nia hela fatin, oinsá ho sira-nia rendimento loroloron nian, se muda ba fali fatin foun? Oinsá

sira-nia oan sira-nia escola se sira tem que obrigatoriamente sai husi sira-nia hela fatin? No situação seluk tan.

Reorganização cidade Díli tem que tau ema nu'udar centro no beneficiário direto ba desenvolvimento no crescimento cidade ida nian, la'ós sai fali vítima iha nian rain rasik.

Reorganização cidade Díli tem que baseia ba ordenamento no plano urbanização ida claro, selae, hasai iha fatin ida mosu fali iha fatin seluk. Hanesan acontece tinan kotuk, hasai ho obrigatório comunidade iha Bidau Santana, maibé fatin ne'ebá la halo buat ida no mamuk hela até agora. Tanbasá tem que sacrifica população se la iha plano ida claro no la iha urgência?

Plano ordenamento urbanização tem que sai plano consensual tanba governação ne'e iha alternância, katak ohin partido ida mak lidera, aban bele seluk fali.

Consenso no entendimento hanesan kona-ba plano ordenamento urbanização la'ós de'it entre partido político sira, maibé tem que envolve mós setor privado no, principalmente, iha conhecimento no entendimento husi população rasik, ho nune'e, hotu-hotu bele contribui ba harii cidade ida inclusiva no bele buras hamutuk ho nia povo.

Sr.<sup>a</sup> Presidente interina no maluk sira hotu, Parlamento ida-ne'e bele foti iniciativa iha tinan 2025 atu hahú ho ato fiscalização ba Governo liuhosi instrumento regimental Interpelação ba Governo kona-ba problema evicção forçada ne'ebé haterus ita-nia população sira. Liuhosi interpelação ne'e, Governo bele mai apresenta ba representante povo nian sá plano ordenamento mak Governo hakarak halo, sá modelo urbanização mak Governo iha ba Díli hanesan cidade capital, ho nune'e bele loke dalan ba debate ida objetivo hodi serbí di'ak liu interesse ema hotu nian.

Bancada FRETILIN nota katak prática evicção forçada husi Governo hatudu momoos la respeita direitos humanos no viola lei kona-ba despejo administrativo nian no potencialmente bele constitui elemento crime penal, ho nune'e, Bancada FRETILIN husu ba órgão competente sira, hanesan PDHJ, Ministério Público no Tribunal rasik, bele instaura processo investigação relaciona ho evicção forçada ne'ebé halo iha Díli laran no município sira.

Ikusliu, atu fó-hanoin ba ita hotu katak tinan 2025 Uma Kreda Católica declara hanesan Tinan Jubileu. Tuir tradição judaica no católica, Tinan Jubileu momento ba ema hotu atu reconhece erro sira no buka atu reconcilia ho ema no Maromak. Iha Tinan Jubileu, Uma Kreda exorta atu ema hotu bele inicia atividades solidariedade, apoio ba sira ne'ebé precisa tebes. Iha tradição judaica, Jubileu mós hanesan tempo ba ema ka ukun-na'in sira atu entrega filafali propriedade sira ne'ebé foti ona ba nia na'in sira, karik momento ida-ne'e mós atu Governo fó filafali povo nia uma ne'ebé Governo sobu ona durante ne'e».

Obrigado barak, Sr.<sup>a</sup> Presidente.



Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado. Tuirmai, ita tama ba intervenções diversas, hahú kedas ho distinta Deputada Olinda Guterres. Se faz favor.

Sr.<sup>a</sup> **Olinda Guterres** (KHUNTO): — Continuação ha'u-nia boas festas do Santo Natal, feliz Ano Novo ba Sr.<sup>a</sup> Presidente em exercício ho colega sira tuur iha leten, ba Sr. Vice-Ministro dos Assuntos Parlamentares, colegas Deputados e Deputadas hotu ne'ebé ha'u hadomi, e la haluha mós mídia, técnico sira, assessor sira ne'ebé iha Parlamento ida-ne'e no mós assistentes ne'ebé loroloron dala ruma acompanha ita-nia Plenária.

Di'ak, ha'u hakarak hato'o problema balu ne'ebé acontece, ha'u haree ho matan.

Ha'u, nu'udar ema ferik no idade ona, hakarak ko'alia buat ne'ebé loos, ha'u lakohi para choque malu tun-sa'e iha loron Na'i Maromak ninian. Ne'e primeiro.

Segundo, ha'u hakarak hato'o problema ida-ne'ebé acontece ohin, horisehik no horibainrua. Horisehik ha'u moras, ha'u bá iha hospital, trancado, iha ema mate na'in-tolu. Coitado, sé mak mate mak ne'e.

Agora, ha'u bá Hospital Nacional Guido Valadares, to'o iha-ne'ebá, China sira mós *antrian* hotu iha-ne'ebá. Ha'u-nia laran dehan, «ha'u mak hatene china lian karik ha'u tau ona China lian bá, china sira-ne'e agora mai barabarak iha hospital halo saida?»

Ohin dadeer-saan fali ha'u mai husi Hera, atu mai serbisu, carreta Governo ninian, carreta privado, trancado iha estrada boot ne'ebá quase tama to'o laran.

Ha'u husu ba colega balu: «Carreta barak loos iha-ne'ebá ne'e atu halo saida mak ne'e?»

«Oh Amá, agora moras ho vírus ida-ne'ebé maka'as liu *Covid-19* ne'e la'o hela iha-ne'e, ne'e mak agora ami mós halo segurança maka'as iha-ne'e».

Ha'u hakarak husu ba ita-nia Governo oinsá ho preparação ita-nia Hospital Nacional Guido Valadares nian ba moras ida-ne'e: iha ona recurso ruma ka lae? Mais ou menos ema na'in-hira?

Ita tem que usa ita-nia recurso Timor ninian, ne'ebé bá escola iha rai-li'ur hasai S2 no S3, fó to'ok direito ba sira tomak atu nune'e sira bele halo atendimento ba moras ida-ne'ebé agora mai ne'e, ba idade avançada no ba labarik sira ne'ebé imunidade tun ne'e lailais de'it atu kona.

Ida-ne'e mak, ha'u-hanoin, ohin ne'e ha'u foti iha-ne'e atu nune'e Sr. Vice-Ministro bele hato'o ba Governo. Ida-ne'e la'ós ba partido ida, la'ós ba político sira, maibé ba povo. *Covid-19* ne'e dehan di'ak, ida-ne'e dehan aat liu *Covid-19*.

Terceiro, iha tan buat oan ida, Hera ne'ebá ne'e horibainhira ha'u ko'alia tiha ona ho Ministro das Obras Públicas katak atu bá hadi'a mota, mas até à data la hadi'a mota ne'ebá, mota tun, ba estraga militar sira-nia uma iha kraik, sasán sira lalin hotu ba tasi laran. Sr. Deputado sira-ne'ebé toma konta ba ida-ne'e, bá to'ok Hera ne'ebá para haree ho matan, katak militar sira agora tuur iha bee leten.

Sr. Vice-Ministro, favor ida hato’o ba Ministro das Obras Públicas hatun ona técnico ruma para sira bele bá hadi’a mota ida ami-nia uma sorin ne’e. Ami-nian la kona, kona maka militar ho ema sira-ne’ebé tuur iha sorin.

Quarto, ha’u ko’alia dala barak ona, to’os ne’ebé ema halo tempo udan hodi kuda batar, karau tama hodi estraga hotu, mais ou menos decisão Governo nian – ha’u foti da la hira ona – oinsá? Animal ne’e bele han de’it iha ema nia to’os sira-ne’e ka? Tanba ha’u-nia ne’ebá mós haú hatama ema serbisu, na’in-11, fulan ida 150 USD. Ho serbisu ne’e maka sira selu sira-nia an, agora karau estraga hotu, Governo, ha’u hato’o, la halo causa.

Mais ou menus ida-ne’e de’it mak ha’u hato’o, Sr.<sup>a</sup> Presidente.

Obrigada barak.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinta Deputada Cedelízia Faria dos Santos.

Faça o favor.

Sr.<sup>a</sup> **Cedelízia Faria dos Santos** (CNRT): — Muito obrigada, Sr.<sup>a</sup> Presidente em exercício.

Ha’u-nia bom dia no respeito ba Ita-Boot, composição da Mesa, distinto Deputado sira, S. Ex.<sup>a</sup> Vice-Ministro, audiência tomak, mídia sira hotu, maluk rona-na’in ne’ebé sintoniza hela transmissão direta husi Rádio Parlamento Nacional.

Uluknanain, ha’u hato’o ha’u-nia boas festas do Santo Natal no feliz Ano Novo 2025 nian, espera katak tinan foun ne’e bele lori mudança boot ba ita-nia Rain.

Tuirmai, ha’u hakarak husu uitoan ba Sr. Vice-Ministro, husi parte Governo nian bele hatete loloos mai ami tanba ita hotu hatene, ita acompanha, katak Orçamento Geral do Estado 2025 nian ita Parlamento Nacional aprova no Presidente promulga molok dezembro 2024; Ha’u mós acompanha katak Governo rasik aprova ona decreto de execução iha reunião Conselho de Ministros, parabéns ba ida-ne’e, maibé to’o data horisehik ha’u seidauk haree katak Ministério das Finanças distribui pacote Orçamento 2025 ba «linha ministerial» sira hotu.

Ha’u mós acompanha katak *Free Balance* to’o agora ita seidauk loke, inclui mós Portal de Transparência sei indisponível hela, tanba ne’e ami husu to’ok ba Governo nia parte: bainhira mak bele distribui pacote orçamento 2025 nian? Ho ida-ne’e labele fó impacto ba ita-nia execução.

Excelência Vice-Ministro, ami ko’alia hanesan ne’e tanba problema boot bainhira ami halo fiscalização ne’e mak escola sira, liuliu merenda escolar, tanba bainhira orçamento tama tarde demais, quase iha município barak mak fulan tolu sira la bele executa sira-nia orçamento ba merenda escolar e ninia orçamento ne’e filafali ba cofre de Estado. Ne’e fó impacto ba ita-nia oan sira, tanba ne’e mak ami husu, se bele karik, tanba processo hotu-hotu la’o lais ona, Governo labele impede iha

implementação ida-ne'e. Ne'ebe, ami orsida rona to'ok Vice-Ministro, fó-hatene to'ok mais ou menos bainhira.

Tuirmai, ha'u mós preocupa uitoan ho ita-nia maluk deficiente mental sira ka moras mental.

Iha Díli laran ne'e, ha'u la'o quase iha dezembro nia laran ne'e, ita haree número ita-nia maluk moras mental sira-ne'e começa aumenta, la'o loos iha estrada klaran sira-ne'e. La'ós mane de'it, maibé feto mós, ami-nia maluk feto ne'e até que hatais roupa laran de'it maka la'o. Triste loos!

Ne'ebe, ami husu PRADET (*Psychosocial Recovery and Development in East Timor*) e Ministério da Saúde, favor ida tau atenção ba ida-ne'e, tau hela sira iha fatin ne'ebé adequado ba sira para bele cura sira-nia moras ne'e, tanba ne'e preocupa tebetebes ba ha'u. Ha'u hanoin, la'ós ha'u de'it, maibé ema ne'ebé la'o, haree sira ho condição ne'e, preocupa mós.

Tuirmai, Vice-Ministro, kona-ba informação ida-ne'ebé ita rona, ita-nia académico sira halo pesquisa kona-ba hahán ne'ebé afetado ho *formalin*, sira-nia pesquisa ne'e, ha'u hanoin, ita hotu acompanha iha mídia, ita-nia maluk académico timoroan sira, iha *formalin* ne'e barak e balu atinge to'o vinte e tal por cento. Ne'e número ida que boot e ita reconhece katak ita seidak iha laboratório ne'ebé próprio ba halo teste, maibé sira sebisu ho estrangeiro, ita bele halo teste ba hahán sira-ne'e. Informação ne'ebé ita rona katak to'o agora mós hahán sira ne'ebé iha *formalin* ne'e iha loja sira sei fa'an hela, ha'u hanoin, Ministério da Saúde, inclui mós AIFAESA, se bele, tau matan ba assunto ida-ne'e, favor ida bele considera ita-nia maluk timoroan, docente, sira-nia pesquisa ne'ebé publica ona.

Ikusliu, ha'u hakarak continua fó apoio ba SEATOU nia serbisu, ba IX Governo Constitucional nia serbisu, atubele hadi'a hikis ita-nia cidade Díli tanba ha'u haree katak foin daudauk ita-nia SEATOU hasai ita-nia maluk sira ne'ebé iha Fomento II, sira hela ne'e ameaçado tebetebes iha mota-ibun. E, ita haree iha vídeo ne'ebé fó-sai, barak, ha'u hanoin, APC (Autoridade de Proteção Civil) mós fó-sai ona katak quase cento e tal uma mak sai afetado ba ita-nia maluk sira ne'ebé hela iha mota-ninin. Ne'ebe, ha'u hanoin, di'ak liu ita apoia Governo ida-ne'e tanba dehan sira mai buka osan ba sira-nia oan sira-nia escola, mas se sira hela iha mota-ibun mak mota lori tiha hotu sira ba tasi, ne'e impacto mós ba sira-nia família, ba sira-nia oan sira.

Ha'u hanoin, Governo tau atenção ba assunto sira-ne'e, tanba ne'e mak Governo foti ação ida-ne'e, e, ha'u nota mós katak Governo iha promessa ona atu fó *ganti rugi* ba sira, ne'e buat di'ak ida, Governo mós ajuda sira lori sira ba sira-nia município. Ha'u fiar katak Governo ida-ne'e sei la husik de'it nia povo atu enfrenta buat barabarak, ne'ebe tempo to'o ona.

Governo ne'e, ema dehan karik, *serba salah*, halo, dehan la di'ak, la halo, dehan la di'ak, aat liután, tanba ne'e mak ami apoia serbisu IX Governo nian liuhosi SEATOU bele continua serbisu ida-ne'e para di'ak ba ita-nia Nação ida-ne'e.

Muito obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinta Deputada Maria Angelina Sarmiento.

Se faz favor.

Sr.<sup>a</sup> **Maria Angelina Lopes Sarmiento** (PLP): — Muito obrigada, Sr.<sup>a</sup> Presidente em exercício.

Bom dia ba Sr.<sup>a</sup> Presidente em exercício, Sr. Vice-Ministro no Srs. distintos Deputados hotu.

Iha biban ida-ne'e ha'u hakarak hato'o continuação de feliz Ano Novo ba ita hotu, hein katak tinan foun ida-ne'e ita bele iha energia no coragem boot liután atu halo serbisu, liuliu ita-nia knaar nu'udar matan, tilun no ibun povo nian atu haree, buat ne'ebé loos ita dehan loos, la loos ita dehan la loos. Nune'e, ha'u mós hakarak hato'o feliz Ano Novo, Tinan Foun ba povo doben Timor-Leste tomak.

Iha biban ida-ne'e iha questão rua mak ha'u hakarak levanta iha-ne'e.

Primeiro, hakarak secunda declaração política husi Bancada FRETILIN nian ligado ho despejo administrativo ne'ebé bele considera hanesan evicção forçada ba ita-nia população sira ne'ebé hela iha Fomento II.

Ita hatene katak situação tempo udan ameaça duni ba sira-nia vida, maibé, se ita compara, dia 04 de abril todan liu. Dia 04 de abril situação inundação todan liu, maibé Governo la foti medida atu duni sira, hasai sira, mas ho aproximação ida persuasiva liu, aproximação ida humanística liu, mas agora situação ida ita la haree dehan ameaça ba sira-nia vida, boot hanesan dia 04 de abril, mas ita dehan ne'e ameçado ona, seidak oho ema ida.

Mínimo, atu hasai ema tem que iha *shelter* ruma ka fatin temporário ruma. Ita haree, ema nia colchão sira hada de'it, labarik sira tanis, uma kakuluk la iha, sira-nia proteção ba saúde oinsá? Sira-nia higiene oinsá? Ida-ne'e mak ita preocupa. Ita hasai ema, maibé husik ema mate la problema, importante cidade bonita?

Ita hasai ema, husik ema la bele han no hamlaha, importante cidade Díli capaz para ema gava? Ha'u reitera fali Amo Papa nia liafuan, «povo ida-ne'e mak ita-nia rico-soin boot liu». Agora, povo ida ho ninia sasán, uma kakuluk la iha, udan been mai, labarik sira tanis, inan-aman, idoso sira ba iha-ne'ebé ita la hatene. E, notícia ne'ebé fó-sai, «se sira moras karik, sira ba hospital», hospital iha capacidade atu acomoda sira ka lae?

Notícia foin daudauk semana kotuk fó-sai katak seiscentos e tal pessoas tama hospital, mate durante período quarenta e oito horas baixa iha-ne'ebá. Agora, se aumenta tan ho situação ida população sira Fomento II, hospital iha capacidade ka lae? Tem que haree katak ita soluciona problema ida no la hamosu fali problema foun. Se ita hamosu problema foun, ne'e la'ós solução.

Ne'ebe, ami husu ba Governo, favor ida aproximação humanística bá! Haree ita-nia povo ne'e hanesan ema bá! Mínimo, lori sira ba iha fatin seguro ruma!

Hanesan iha Tasi-Tolu, fatin ne'ebe uluk ita usa ba *Covid-19* nian, muda tiha sira ba iha-ne'ebá mak dudu sira sai bá, la problema, depois mak fó opção ba sira. Não me digas ida-ne'e de'it mós Ita-Boot sira estratégia la iha?

Haree, iha Hospital de'it la bele acomoda ema, se moras foun mosu mai. Ohin Deputada sira balu halo intervenção dehan vírus foun ida mai, maioria husi sira ne'ebé ita muda sai husi fatin ne'ebá ne'e mesak labarik de'it, e vírus ne'ebé foun ne'e afeta ba labarik sira, se acontece ida-ne'e karik, sá medidas mak ita bele halo atubele previne? Labele ona!

Ne'ebe, ami hanoin, Governo precisa haree didi'ak, bele muda ema sira-ne'e, maibé mínimo dos mínimos iha fatin temporário ruma, hasai tiha sira, muda netik tiha ba mak depois fó opção ba sira: «Imi hakarak fila ba imi-nia município ka imi iha fatin alternativa ruma?» Se la iha, ne'e tristeza boot, ami lamenta tebetebes.

Segundo, inclui mós evicção ba fatin Café Atsabe, estranho tebetebes quando Ministério do Comércio e Indústria ba inaugura hodi promove no reconhece iniciativa husi Sr. Ameta, Café Atsabe nia na'in, husi sorin seluk Governo ida-ne'e ba hasai. Será que iha ona alternativa ba ema ne'ebé halo negócio?

Ita haluha tiha katak ita-nia política ne'ebé ko'alia iha-ne'e kona-ba promove setor privado atu sira mós bele hasa'e receitas domésticas atu ita mós bele iha diversificação económica, hodi nune'e neineik-neineik ita bele reduz dependência ba ita-nia fundo petróleo. Mas, realidade, ema sira ne'ebé halo negócio, contribui ba hamenos desemprego ba ita-nia timoroan sira, sira-ne'e mak hetan mós evicção, la hatene iha alternativa ba sira atu Governo ajuda hodi cria fali condições ba sira ka lae. Ema sira ne'ebé ita hasai, liuliu ida Café Atsabe, sira mós contribui ba hamenos desemprego no mós sira bele hetan rendimento iha sira-nia família. Ida-ne'e hanesan inovação ida, ita tem que aprecia Sr. Ameta, hanesan na'in ba Café Atsabe, jovem, ho nia esforço rasik, ho nia kosar-been. Ami hein katak Governo bele fó alternativa ba negociante sira-ne'e atu continua, tanba sira la tane liman ba Governo atu fó han sira, tau etu bikan ida iha mesa leten ba loron ida.

Ida-ne'e de'it, obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado Antoninho Doutel Sarmiento.

Se faz favor.

Sr. **Antoninho Doutel Sarmiento** (FRETILIN): — Obrigado ba tempo.

Ha'u-nia respeito ba Sr.<sup>a</sup> Presidente Parlamento interina, Vice-Ministro dos Assuntos Parlamentares, colega Deputado no Deputada sira, mídia sira ne'ebé halo cobertura iha dadeer ida-ne'e, técnico e assessor sira, ba povo Maubere e Buibere.

Saudações revolucionárias!

**Deputado sira husi FRETILIN:** — Sempre revolucionárias!

*Deputado sira-nia lian ki'ik loos.*

**Sr. Antoninho Doutel Sarmiento (FRETILIN):** — La forte liu!

Di'ak, ha'u hanoin, em primeiro lugar hato'o ha'u-nia boas festas e bom ano ba povo tomak iha Rai ida-ne'e. Ita fó boas entradas, balu sente contente ho boas estradas, balu mak simu fali boas entradas ne'e ho más entradas.

Hodi hanoin atu reforça declaração ne'ebé ohin hatete, tanba ita haree iha mídia, iha televisão sira, labarik sira husu ba nia inan-aman: «apá, amá, ita hela iha-ne'ebé para ami continua ba escola?» Liafuan ida-ne'e, hanesan líder, ita tem que hanoin saida mak atu halo.

Tia faluk ida ho nia oan na'in-neen hatete katak «ami-nia moris ne'e ami la husu ba ema ida. Ha'u tem que serbisu maka'as atu fó han labarik na'in-neen ho ha'u-nia energia, ho ha'u-nia kbiit». Tanba ne'e, ita hasai ema, ita la sukat condição, sá condições sai ba atu hela, ne'e mak ita-nia problema. Governo hasai ema, tem que iha condição mínima ruma iha-ne'ebá para hatuur nia.

Hanesan tia ida dehan: «Iha eleição mai abraço, re'i tun rei sa'e, mas ikus ukun tiha, halo ami hanesan ne'e. Udan mai, foti fali kaleen hodi taka fali ba oan sira-nia leten para evita udan».

SEATOU hatete katak carreta bele lori sira bá, to'o agora, la hatene, lori bá ona ka lae, ha'u hein katak hetan resposta di'ak.

Ita-nia Constituição dehan, «povo ne'e iha direito no liberdade atu circula iha rai laran tomak», mas no fim, ita bá, ita-nia intervenção dehan: «Imi fila ona ba imi-nia município!». Hai, rai ida-ne'e nu'usá mak sai fali hanesan ne'e? Então rai iha Díli ne'e imi-nian de'it? Tanba ne'e, ami sente preocupado tebetebes, sente triste katak atuação ida hanesan ne'e atuação ida discriminativa tebetebes, ita hasai povo ki'ik sira-ne'e dala ruma buka hela sira-nia moris ba moris loron-loron.

Ha'u halo pergunta ida: cada semana Primeiro-Ministro hasoru Sr. Presidente da República, sira na'in-rua ko'alia saida?

Depois ikus, quando SEATOU halo buat hanesan ne'e, Sr. Presidente halo fali nia declaração iha mídia katak atuação sira-ne'e mós la di'ak. Então sira na'in-rua hasoru malu la ko'alia oinsá atu hasai ema? Oinsá atu fó orientação ida atu hasai ema seluk, tem que iha condição, tanba ne'e povo.

Ita tem que consciente, se uluk iha luta-na'in ida, ema sobu povo, dehan «*kepala dua*», ita bá hasai tiha povo ida-ne'e, dehan «ne'e contra direitos humanos, contra povo nia liberdade atu hela», e ohin ita bá sobu uma ida maibé la iha condição ba povo ne'e rasik. Liuliu labarik sira agora tama fali escola ona, ne'e ita-nia problema, tanba labarik sira-ne'e mak futuro Nação nian, futuro atubele leva filafali

Nação ida-ne'e atu la'o ba oin. Tanba ne'e ami hanoin katak declaração ne'e importante, no husu Governo atu tetu, se sira hasai ona, atu fó solução ba povo ida-ne'ebé agora sai vítima ba ida-ne'e.

Tuirmai, ha'u hakarak hatete ba Vice-Ministro, durante iha foho, ossan terceira idade ne'e ferik katuas sira seidak hetan iha fulan tolu. Duzentos dólares ba família la hetan ona, pelo menos, terceira idade sira tem que hetan sira-nia osan atu festeja Natal ho Tinan Foun.

Ita sente triste, ita bá husu:

«Ai, ami ahi mate hela!»

«Tanba saida?»

«Be ami-nia terceira idade ne'e mós Governo la fó».

Mas, foin daudauk Governo, se la sala, aprova resolução balu iha Conselho de Ministros atu fó osan ba membro Governo ida ho dez mil, ita aprova osan ba malu, pois povo nia osan terceira idade de'it mós ita la bele fó.

Tuirmai, iha dia 31 de dezembro, iha jovem ida – ha'u hanoin, ida-ne'e tem que halo investigação – iha Alas Dotik, jovem ne'e la tau capacete, família coopera, mas depois, dehan polícia kaer nia tau fali ba *knalpot* mak *gas* motor para estraga labarik nia tilun. Atuação ida-ne'e atuação polícia ida tuir ordem ho lei mak ne'e ka lae? Ne'e precisa atu haree no halo investigação di'ak ba assunto sira hanesan ne'e. Ita labele atua sasán hanesan «premanismo», vandalismo, ne'e labele! Família informa assunto ida-ne'e no fó-hatene hela iha-ne'e para Vice-Ministro atu considera, atu haree assunto ida-ne'e.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado José Virgílio.

Faz favor.

Sr. **José Virgílio R. Ferreira** (CNRT): — Di'ak, obrigado ba tempo.

La haluha ha'u-nia respeito ba Presidente em exercício, Mesa Parlamento Nacional, distinto Deputado no Deputada sira no Vice-Ministro dos Assuntos Parlamentares.

Dala ida tan hato'o boas festas do Santo Natal no Tinan Foun 2025, ita hotu espera katak buat hotu-hotu bele la'o di'ak.

Tuirmai, ha'u hakarak hato'o, foin lailais bá halo visita ida iha Aldeia Cai-Cassa, Posto Maubara nian, iha Suco Gugleur, iha-ne'ebá condições estrada la di'ak. Estrada ne'ebé uluk sira ke'e de'it ho liman, tempo udan começa rai monu, depois halo kloot estrada ida-ne'e. Ne'ebe, comunidade ho chefe suco husu para Governo bele tau matan atubele haree estrada ida-ne'e hodi loke, tanba população sira

ne'ebá moris ho agricultura, hanesan café, baunilha no mós maek, abacate. Produto sira-ne'e sira lori mai fa'an iha município, to'o mai iha Díli, condição estrada mak ladún di'ak ba sira.

Tuirmai, hakarak foti tan kona-ba iha parte Ermera, Suco Hatulia Vila, iha Aldeia Simohei, condição estrada mós ladún di'ak. Se bele, husu ba Obras Públicas ho IGE bá haree para oinsá atu loke estrada emergência ba população sira bele liu, bele fó acesso, tanba iha-ne'ebá café barak no mós baunilha, ne'ebé sira mai fa'an ba CCT ho NCBA mak sosa iha-ne'ebá.

Tuirmai, estrada iha Suco Hera, ita haree katak foin lailais acontecimento udan, inundação, iha Suco Hera, iha Aldeia Hali Dolar, Deputada Olinda foti, ne'e condição grave tebetebes. Ita haree katak construção ida la'o hela iha-ne'ebá mas seidauk máximo ba povo nia hakarak, precisa hadi'a mota ne'e ho di'ak.

No iha Hali Dolar ne'e mós, iha Aldeia Sukaer Laran, iha parte Beraca nian ne'e, iha HENIKEN nia kotuk ne'e iha mota ida iha-ne'e, mota ne'e sai mai la iha tiha dalan, no acontecimento ida uluk iha 04 de abril iha tinan hirak liubá ne'e estraga ita-nia comunidade sira-nia uma e inclui mós grupo kuda *buah naga* no hakiak fahi, fahi-luhan ne'e sobu to'o agora.

Ha'u mós ko'alia ho ida hakiak fahi ne'e, nia dehan: «Se ami continua, mota ne'e tem que hadi'a nia barragem, para mota ne'e bele la'o tuir nia fatin». Husi Beraca nian hale'u mai sai fali mota rua, ida mai mosu fali iha Sr. Rui Castro nian, uitoan ne'e mak hakarak hato'o, tanba iha-ne'ebá mós iha capela ida harii besik kedas iha mota-ibun.

Depois, eletricidade iha-ne'ebá mós comunidade sira liga de'it ho ai-riin, au, mak sira tau ba no anin huu mai buat sira-ne'e monu hotu.

Ha'u hato'o ona ba parte EDTL, sira bá haree ona mas seidauk iha decisão ruma para halo instalação eletricidade iha-ne'ebá, ne'ebe husu hela ba Vice-Ministro dos Assuntos Parlamentares, hato'o hela ba ministério relevante hodi haree ida-ne'e tanba ne'e importante tebes.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado António Calau.

Faz favor.

Sr. **António Moniz Calau** (FRETILIN): — Di'ak, obrigado ba oportunidade.

Ha'u-nia respeito ba Presidente Parlamento Nacional em exercício, composição da Mesa, ba Excelência Vice-Ministro dos Assuntos Parlamentares, colega Deputado sira, técnico no assessor sira hotu, bom dia.

Uluknanain, continuação hato'o ha'u-nia cumprimento boas festas e feliz Ano Novo 2025 ba ita hotu, especial ba povo doben Timor-Leste.



Primeiro, ha'u hakarak secunda declaração política husi ami-nia bancada, FRETILIN ninian, iha relação ho evicção ne'ebé IX Governo halo, liuliu Secretário de Estado da Toponímia ho nia equipa halo ba ita-nia povo sira. Hanesan representante povo, ha'u condena ato «brutalismo» ne'ebé Secretário de Estado SEATOU halo.

Ha'u aceita katak Díli nu'udar capital da Nação, ita precisa ordena, organiza, atu nune'e cidade Díli sai furak iha ema nia matan. Maibé, atos ne'ebé Sua Excelência Secretário Estado halo ne'e «brutalismo» tebetebes e vandalismo, tanba construções ne'ebé ita-nia cidadão sira halo iha mota-ninin ne'e hodi sira-nia kosar-been mak halo, sira nunca husu esmola ba qualquer Governo ida. Maibé, atos hirak-ne'e hatudu «brutalismo» e fuan fatuk, fuan toos hasoru ita-nia povo, liuliu iha *momen-momen* ne'ebé ita sei iha Natal ho Tinan Foun.

Ha'u hato'o experiência badak, ki'ikoan ida de'it.

VIII Governo ninian, vítima husi acontecimento iha 4 de abril de 2021 ita retira vítima sira-ne'e, ita cria condições ba sira, aluga uma *kos* ba sira hela, depois ita apresenta opção: «Se iha Díli laran imi-nia rai iha, imi fila ba hela iha imi-nia rai, Governo fó material construção para imi halo. Se imi la iha rai iha Díli laran, imi fila ba iha imi-nia hela-fatin». E, Governo responsabiliza, tula, entrega material, acompanha hodi husik to'o sira-nia aldeia.

Ha'u autor ne'ebé acompanha situação ne'e iha momento ne'ebá. Tanba ne'e, dala ida tan, considera bá! Ne'e ita-nia povo, la'ós ita-nia inimigo. E ami acompanha hela katak iha projeto ida, barreira boot ida mai to'o ona iha fatin evicção ne'e, companhia Salimago mak halo construção ida-ne'e, aproveita inundação be uitoan ba uma-kain ualu ne'e, urgentemente ita tem que hasai 288 chefe da família ne'ebé la afetadu husi inundação. Loloos ne'e uma-kain ualu iha kraik ne'e mak ita hasai uluk. Tanba ne'e ami husu ba IX Governo atu tau consideração, wainhira atu hasai ita-nia povo husi fatin ruma, primeiro cria condições, pois retira sira husi fatin.

Segundo, ha'u-nia observação ba movimento tráfico iha Díli laran.

Excelência, tinan ba tinan, laron ba laron, Díli laran ne'e kloot ba beibeik, transporte público aumenta, ita-nia cidade ki'ikoan maibé ita haree movimento tráfico iha Díli laran ne'e, liuliu iha horas serviços ka laron boot ruma, ita susar tebes atu halo movimentação. Tanba ne'e ami husu ba Excelência atu liga ba instituição relevante, liuliu polícia trânsito, atu serviço máximo iha cidade Díli, liuliu liga ba movimento tráfico sira.

E, ami husu mós atu tau posto ida iha cemitério público sira, posto polícia trânsito, tanba ita acompanha, wainhira iha atividade hakoi mate ruma, dadeer to'o loraik quase iha Becusse ne'e engarrafamento total. Polícia trânsito sira iha-ne'ebé? Se bele, tau posto permanente ida iha-ne'ebá atu organiza movimento tráfico iha-ne'ebá.

Ha'u-nia intervenção ba dadeer mak ida-ne'e.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado. Tuirmai, distinto Deputado Marcos Soares Martins. Faz favor.

Sr. **Marcos Soares Martins** (CNRT): — Obrigado ba oportunidade.

Respeito ba Excelência Presidente Parlamento Nacional interina, Secretária e Vice, ba distinto e distinta Deputado sira hotu, ba Vice-Ministro dos Assuntos Parlamentares, saudações Tinan Foun ba ita hotu.

E, ba mós povo doben Timor laran tomak, ami-nia saudações ba ita hotu, hein katak iha tinan ida-ne'e Maromak sei haraik graça mai ita hodi bele hadi'a ita-nia moris ba futuro ida que di'ak liu.

Agradece mós ba Maromak ne'ebé sei fó oportunidade ba ita hirak-ne'e ohin bele hasoru malu iha primeiro dia, primeira sessão tinan 2025 nian.

Atu continua, ha'u mós secunda ho questões ne'ebé foti husi Deputada Cedelízia, ligado ba processo execução Orçamento 2025, tanba, quando ita demora iha processo, com certeza afeta ba ita-nia execução. Quando ita demora, com certeza estrada sira ne'ebé agora aat, aumenta grave. Se aumenta grave, afeta ba ita-nia gasto, tanba estrada ne'e tinan aumenta aat afeta mós ba *BoQ (Bill of Quantities)*, ne'ebe, karik prepara tiha ona, então nia afeta ne'e ba iha ne'ebá, com certeza ninia custo ne'e aumenta, sa'e tan.

Segundo, atu hatutan ka hato'o hela preocupação ida mai husi ita-nia comunidade iha Suco Leguimea, Aldeia Hauhei no mós Aldeia Hotino, Suco Mertuto. Sira preocupa ho linha eletricidade ne'ebé instala tiha ona iha 2016, maibé até momento ida-ne'e seidauk lakan, tanba ne'e mak husu ba Secretário de Estado da Eletricidade, se bele, visita netik ita-nia povo sira para rona sira-nia preocupação, rona sira-nia problema hodi fó solução. Sr. Secretario Estado ne'ebé ami haree, ema ida que jovem e bonito, maibé com certeza ema la aceita ou la concorda, quando ita, jovem ida que assume cargo, maibé iha hela de'it Díli. Tanba ne'e mak povo husu atubele bá rona sira-nia preocupação tanba ahi ne'e hein de'it atu lakan, buat hotu instala hotu ona, até quarto laran mós, pré-pago sira mós instala hotu ona, e sira preocupa de'it mak tanbasá desde 2016 até momento ida-ne'e seidauk lakan. Tanba ne'e mak husu ba Sua Excelência Secretário de Estado e Ministro das Obras Públicas, ba mós EDTL, I.P. ne'ebé iha responsabilidade ba ahi, atubele tun ba para rona direta e fó solução. Tanba IX Governo comprometido katak ahi sei lakan iha território tomak, tanba ne'e mak husu ba parte ne'ebé iha responsabilidade atubele serbisu ho máximo.

Obrigado ba ita hotu ninia rona.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado. Tuirmai, distinto Deputado Florentino Ximenes «Sinarai».

Sr. **Florentino Ximenes da Costa «Sinarai»** (FRETILIN): — Obrigado, Presidente em exercício, componente da Mesa, distinto Deputado sira, Vice-Ministro dos Assuntos Parlamentares, povo doben Timor-Leste, camarada Buibere no Maubere sira hotu, bom Ano Novo ba ita hotu.

Tinan 2025 ita hahú kedas ho hahoris desastre ba ita-nia povo, liuliu Fomento II. Relembra filafali Santo Padre nia liafuan «Lafaek», lafaek *penjelmaan* Germano sai tiha balada fuik no sobu ita-nia ema sira sem neon ho laran.

Ita hotu concorda, Díli tem que moos, Dili tem que kabeer, maibé ninia kabeer labele sosa fali ho matan-been, Díli nia kabeer labele sosa fali ho sofrimento. Se ita hotu iha neon, bá husu ita-nia maluk afetado sira ida por ida karik, sira hotu sei concorda mak Díli nia moos, sira hotu sei concorda mak Díli nia oin bonito, sira la espera katak tinan 2025, IX Governo dehan atu halo serbisu mak hahú kedas ho situação ida-ne'e.

Sr. Vice-Ministro dos Assuntos Parlamentares, Constituição da República, artigo 44.º, ko'alia momoos circulação povo ida-ne'e nian iha fatin ne'ebé de'it. Tanbasá Sr. Germano *membatasi* ema dehan: «tem que filafali ba imi-nian rain?»

Ne'e mak dehan plano?

Sr. Vice-Ministro dos Assuntos Parlamentares, evicção, despejo administrativo ida-ne'e, ita hotu concorda, maibé nia enquadramento jurídico ne'e mak oinsá loos?

Sr. Vice-Ministro, ha'u hanoin filafali 99, força da milícia sira suruh *persis seperti ini*. Hanoin halo didi'ak bá! Fó fatin sira digno bá! Tau sira iha condições bá! Ha'u lakohi ko'alia buat seluk tanba ha'u haree Fomento II ne'e ita hahú kedan ho tinan ida ne'ebé ita cria hela moras mental iha ita-nian população ida-idak nia ulun, liuliu situação Fomento II.

Hanoin bá! Sai netik hanesan ema ida bá! Labele halo ita-nia ema sira-ne'e hanesan loos balada fuik. Uma ualu de'it mak, tuir loloos ne'e, afetado liu, tanbasá sira seluk 288 ne'e tem que sai hotu kedas iha tempo badak de'it para cria hela sofrimento ida-ne'e?

Atu fó-hanoin filafali ba IX Governo, 04 de abril 2022 inundação ida que boot, udan ida que boot loron tomak ida, mas la consegue oho ema barak. Ida-ne'e nem lori animal ida, iha situação loron hirak liubá, tanbasá ita ho ita mak halo malu hanesan ne'e? Ita timoroan hotu, tanbasá?

Se sira hili partido ida ida-ne'ebé, A, B, ha'u la fó importância, mas ha'u haree nia humana ne'e. Nu'usá ita la hanoin? Santo Padre nia liafuan talvez iha dalan, lafaek ida ne'ebé *penjelmaan*, Germano, mak mai daudauk ona ne'e.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Armando dos Santos.

Faz favor.

Sr. **Armando dos Santos Lopes** (PD): — Di'ak, obrigado ba tempo.

Molok ha'u atu hatu'ó mensagem povo nian ne'ebé ha'u encaixa iha ha'u-nia intervenção ohin loron nian, continuação, ami família boot Partido Democrático, hatu'ó boas festas do Santo Natal, dame no domin Natal 2024 e bom Ano 2025 nian.

Sr.<sup>a</sup> Presidente Parlamento Nacional em exercício, membro da Mesa, ba Sua Excelência Vice-Ministro dos assuntos Parlamentares, ba colega distinto no distinta Deputado sira hotu, membro do Governo, mídia e técnica sira, funcionário tomak Parlamento Nacional, povo em geral, ba maluk sira hotu ne'ebé moras hela iha hospital, iha prisão Gleno no Becora, ba confissão religiosa sira hotu ne'ebé iha Timor laran tomak, ba maluk companheiro sira, ba maluk camarada sira, ba maluk sira ne'ebé, iha era ukun an ida-ne'e, balu sei sente hela iha *stigma sosial* nia laran, no balu sei sente hela iha proletária nia laran, Tinan Foun ba ita hotu, molok loro-matan foun lori ita tama ba esperança dame, paz no ksolok igualitária iha Rai doben ida-ne'e.

Tuirmai, mensagem povo nian ba IX Governo Constitucional no ba ita hotu iha Uma Fukun ida-ne'e.

Mensagem primeira, relação ho atos corrupção ne'ebé durante ne'e sai *isu, polemik*, iha ita-nia Rain, que durante ne'e povo acompanha no observa, portanto, povo sira hatu'ó, husu ba IX Governo atu esforça an, livre husi indicadores corrupções ne'ebé durante ne'e ita desconfia la'ó hela nu'udar veneno ba consciência, integridade no moralidade construção do Estado de direito democrático Timor-Leste.

E segundo, povo sira husu ba membro Governo sira atu hamoos an husi hanoin hirak ne'ebé iha tentativa atu aproveita direito povo nian hirak ne'ebé la merece ita atu aproveita.

Husu mós ba Governo atual atu hahú previne do que combate corrupção. Povo mós husu ba Governo ida-ne'e atu acelera processo indicadores corrupções ne'ebé iha oiain hela tanba hakarak hatene nia verdade no conhece sé mak herói iha independência ida-ne'e. Povo mós husu ba ita hotu atu labela usa corrupção ne'e sai hanesan instrumento político ba só tempo campanha, hodi hamate democracia no ataca personalidade hodi atinge interesse balu, maibé precisa processo ida ho honesto e rapidamente, hodi hatudu ba povo katak iha interesse duni combate no previne atos corrupção ne'ebé buras, la'ó hela iha Timor-Leste.

E, povo mós husu Governo atu labela hatene de'it *blokir* corrupção ho escala ki'ik no protege corrupção ho escala boot sira, ho nune'e responde tiha especulação povo nian, katak la iha corruptor ida atu kaer nia maluk corruptor seluk.

Mensagem segunda, ba membro Governo sira katak posição ne'ebé Maun Boot fó ne'e confiança, nune'e confiança ne'e realiza em equipa de trabalho, colabora ba malu entre ministro ho vice-ministro sira, entre ministro ho secretário Estado, serbisu em equipa forte atu hatudu serbisu, atendimento ida-ne'ebé ba povo ho lailais, mamar e resultado ida mais significativo hodi povo bele sente.

Governo mai ho programa, mai ho orçamento, e programa ho nia orçamento, no membro Governo nu'udar máquina operador. Portanto, imi iha ciclo pacote ida de'it, ida falha pacote mós falhado.

E mensagem terceiro, ba ita Deputado sira, povo husu atubele tetu didi'ak orçamento ba ex-titulares husi órgão haat, la sala karik povo hatene, por volta de 180 000 USD, significa katak cada fulan 15 000 USD, cada loron por volta de 750 USD, ne'e dalan tuir lei, maibé husu para ita bele halo balanço *politik*, tanba ita-nia povo sira loron ida foin hetan por volta 1,60 USD. Ne'e ba terceira idade sira, ba sira seluk ha'u seidauk halo pesquisa ruma.

Portanto, ida-ne'e mak ha'u hakarak hato'o.

E ikus, ha'u-nia mensagem ba membro Governo balu, karik balu sente todan, labele «koma an» iha posição to'o mandato Governo ida-ne'e remata, tanba haterus povo. Loke an ba Conselho Ministro atu buka to'ok alternativa di'ak! Di'ak ba dignidade Governo ida-ne'e nian no di'ak ba ita-nia povo ida-ne'e. Natal dehan lori moris, Tinan Foun lori moris foun ba ita hotu.

Presidente, ida-ne'e mak ha'u hato'o, mensagem povo nian, mensagem ha'u-nian, ba Tinan Foun 2025 nian.

Ba atenção hotu, muito obrigado.

Tempo ha'u fó fila.

Sr.<sup>a</sup> **Presidente** (Maria Terezinha da Silva Viegas): — Obrigada, distinto Deputado.

Tuirmai, Sr. Deputado Antoninho Bianco.

Se faz favor.

Sr. **Antoninho Bianco** (FRETILIN): — Obrigado.

Dala uluk agradece ba Maromak ne'ebé fó vida atubele hatutan Ninia liafuan iha Uma ida-ne'e.

Ha'u-nia respeito ba Presidente Parlamento Nacional ho componente Mesa, e representante Governo, maluk sira hotu, liu-liu ba povo Maubere ho Buibere sira ne'ebé sintoniza no haree hela Plenária ida-ne'e.

Ami-nia declaração, Bancada FRETILIN nian, ne'e nu'udar expressão sentimento povo nian e ami-nia sentimento pertença ba sofrimento povo nian.

Claro katak ita ema, ne'ebé kaer ukun ka la kaer ukun, tem que iha sentimento de pertença ba ema sira-ne'ebé afetado. Se ita la iha sentimento de pertença ba ema nia sofrimento, ita desumano, tanba Maromak nia obra boot liu ida hanesan Nia an ne'e mak ema, la'ós obra seluseluk. Se Maromak nia ema ne'ebé Nia cria hanesan Nia an, lalenok, ita ne'ebé mai, dehan hanesan obra Maromak nian, ita halo ita-nia maluk sira hanesan la'ós ema, ha'u hanoin, ita tem que halo reflexão boot. Ukun-na'in husi Antigo Testamento mós hanorin, até que iha Natal liubá ita haree, ita rona Bíblia ko'alia, Antigo Testamento no Novo Testamento.

Foin daudauk ita celebra Natal, katak Jesus mai hodi naroman atu halakon nakukun, Tinan Foun ne'e tinan foun ne'ebé lori naroman ba ema hotu, satán ukun-na'in sira.

Ha'u hanoin, 2024 liu tiha fó experiêncía, buat ne'ebé di'ak ita hala'o, maibé fó experiêncía ne'ebé aat ne'e di'ak liu ita soe, ne'e nakukun nian.

Ukun para serbí. Ha'u hanoin, ukun la'ós para ema serbí, atu gaba an. Cidade, cidade! Maibé cidade la liu ema. Ema é importantíssimo liu, ema mak halo cidade ne'e moris, la iha ema karik cidade la iha, Díli la iha. Ha'u hanoin, maluk sira, representante Governo, porta-voz Governo, ita tem que sai porta-voz ba sofrimento povo nian, ne'e mais importante. *Jadi*, mundo ne'e provisório, sé mak tuur Presidente ka, Governo ka Deputado, é tudo provisório. Ita halo peregrinação para último ita-nia moris to'o aban-bainrua nian, tanba ne'e ha'u sente laran ne'e taridu uitoan.

Ha'u mós sente katak se ita mak iha sira-nia fatin karik halo nu'usá. Governo ida uluk harii uma ba ema kbiit laek, Governo ida agora sobu ema kbiit laek nia uma, coitado! Contraditório ne'e.

Ita halo buat ida que, ha'u hanoin, ema ki'ikoan sira hatene ko'alia liu fali ita ne'ebé kaer ukun no ita ne'ebé representante povo ne'e.

Maluk sira, Rai ida-ne'e precisa ita-nia hanoin di'ak, laran moos atu hala'o knaar, atu serbí. Serbí Maromak só serbí maluk sira. Labele serbí de'it ema rico sira, combate corrupção! Corrupção ne'e hanesan buat barak-barak mak..., combate maka causa kiak nian. Maibé ita-boot sira combate ba ema kiak sira-ne'ebé tuir loos la'ós. Imi ba combate fali ema kiak sira-ne'e, ne'e mak imi-nia obra ne'e sala boot. Ha'u hanoin, membro Governo ne'ebé ladún saida karik, tem que sees, CNRT ema barak. *Masa* CNRT ema la iha para troca ema sira-ne'ebé problemático ne'e?

Oh, Ita-Boot sira kaer ukun ne'e, ohin la di'ak, aban tem que hasai tiha tanba povo precisa ema atu serbí. Ha'u la'ós la gosta ema, lae! Maibé ha'u fiar katak CNRT ema barak para troca tiha ema sira-ne'ebé halo terus povo ne'e.

Na'i Maromak hein katak Espírito naroman Santo nian mak leno ita-boot nia laran, la'ós espírito nakukun nian mak leno ita-nia laran. Então, hahalok nakukun sei domina fali, FRETILIN tem que luta contínua duni tanba ne'e mak luta ba lia loos, tempo ne'e naruk, maibé lia loos tem que bá beibeik, e hein katak ita-boot sira sente buat ne'ebé ema seluk sente. Ema sofre, ita mós tem que sente sofre! Sentimento de pertença ba povo nia moris mais importante do que sentimento pertença ba posição ne'ebé ita iha.

Obrigado barak.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Natalino dos Santos.

Se faz favor.

Sr. **Natalino dos Santos Nascimento** (CNRT): — Obrigado.

Bom dia ba Sr.<sup>a</sup> Presidente interina ho Mesa, Sr. Vice-Ministro dos Assuntos Parlamentares, colegas distintos Deputados, rona-na'in povo doben Timor-Leste mak ha'u hadomi.

Bom Ano ba ita hotu e tinan foun sei lori energia foun mai ita hotu.

Ha'u hakarak foti questão ida importante tebetebes, primeiro, ha'u haree katak Governo iha competência oinsá atu ordena cidade, ne'e responsabilidade ba Estado. Governo mós gestor ba Estado atu lori Estado ida-ne'e ba tranquilidade tuir ita hotu nia...

Ita haree didi'ak Lei, artigo 115.º, alínea c), iha-ne'ebá fó competência ba Governo. No mós ha'u hakarak dehan, colega sira ohin cita artigo balu, artigo 44.º, loos! Mas, se Governo la ordena, ita livre para bá naran hela tun hela sa'e, ne'e problema boot. Ita tem preocupa porque foin daudauk ita hotu haree liuhusi *YouTube*, desastre ne'ebé iha mota ne'ebá, ita sente hanesan triste tebes, e Governo iha dever moral atubele bá salva.

Ita haree katak inundação, engarrafamento, agora ita haree ordenamento território ida-ne'e sabraut de'it, tanba ne'e mak ha'u husu ba Governo, liuliu Vice-Ministro, atu tau atenção.

Ita haree agora daudauk iha tasi-ibun, iha residência Presidente Parlamento nian, ema começa bá halo hotu ona, fa'an arbiru ona iha-ne'ebá, iha foho lolon sira-ne'e começa ema ke'e. Tanbasá? E Governo tem que começa duni atu ordena, organiza, cidade ida. Se dehan, tanba ita livre be ita bá halo tiha uma iha mota-ninin, depois quando desastre, mota lori ita, mota sobu ita, ita husu ba Governo, então, Governo iha dever moral atu assegura. Mas, quando ita haree evicção ne'ebé halo daudaun ne'e é continuação husi Governo ida ba Governo seluk.

E, antes mós fó-hatene tiha ona. Ita haree katak SEATOU halo tiha ona diálogo ho sira, tau tiha ona marca mean mean sira-ne'e, fó ona prazo para depois atu halo mamuk. Se agora Governo halo nia serbisu, ita haree assunto sira-ne'e ita tau questão direitos humanos, liberdade, ita interpreta artigo 44.º, imi bá haree artigo 54.º mós fó direito privado ba ema timoroan. Maibé, será que tanba Constituição artigo 44.º ou 54.º fó be ita naran bá hela tun hela sa'e de'it? Tanba ne'e ha'u husu Governo atu ordena ona, hanesan Delta, ocupante sira halo construção fa'an fali, ne'e Governo tem que foti, la'ós aluga fali 10 USD ka 100 USD. Karik bele, halo ona medidas para halo classificação ba sasán sira-ne'e atu fó receitas domésticas ba Estado.

Então, Governo nu'udar gestor, labele halo gestão? Labele ordena cidade ida-ne'e?

Ita preocupa tebetebes, mas ita-nia consciência nu'udar ema ne'e, hakarak ukun rasik-an ita tem que contribui ba desenvolvimento, desenvolvimento la'ós Estado de'it, desenvolvimento iha área hotu-hotu, área social, *politik* e económica.

Agora dehan, ne'e hanesan desastre boot ida, tanba ne'e ha'u husu colega sira, ita preocupa, mai ita bolu atenção ba Governo atu tau atenção. Ita tuir hela processo ne'e, agora ita mai julga dehan katak ditadura, vandalismo, Governo halo hela diálogo, Governo halo hela sensibilização, fó-hatene ona.

Tanba ne'e ha'u husu ba Sr. Ministro, ema sira hela iha foho, rai Estado nian ke'e estraga, ida-ne'e mak afeta ba desastre *kota* Díli. Bele halo ona *aturan* para depois hasai sira husi fatin ne'ebá para depois halo prevenção, labele iha desastre para cidade Díli ne'e Governo labele preocupa.

Hanesan ema sira halo iha tasi-ibun ne'ebá, ha'u horisehik liu husi tasi-ibun residência Presidente nian iha Farol ne'ebá ne'e começa sira lere no fa'an ona iha-ne'ebá. Tanba ne'e ha'u husu Governo, ema sira hela iha uma iha Delta, ocupante 1999 nian, depois halo construção balu fa'an tiha, ne'e crime. E, sira-ne'ebé halo construção uma andar sem autorização husi Governo, Governo tau medidas oinsá atu selu tuir capacidade Governo nian, tuir classificação rai nian.

Tanba ne'e ha'u aprecia e fó apoio nafatin ba Governo ida-ne'e, maibé husu Governo atu tau atenção ba ita-nia ema sira. Karik muda, fó netik apoio ba sira, fó mós, *ya...* para sira bele sustenta sira-nia moris durante três meses, depois sira bele buka fali serbisu seluk.

Mas rai Estado nian Estado tem que apodera tanba rai ne'e *funksi sosial e funksi ekonomi*. Agora, se *trotuar* leten ne'e ema halo tiha e *funksi sosial* halo nu'usá?

Tanba ne'e, dala ida tan, obrigado, Sr.<sup>a</sup> Presidente, ha'u husu Governo tem que sério atu foti decisão ba ocupante ilegal sira-ne'ebé ocupa iha 1999 uma Estado nian, ne'ebé agora halo construção aas, halo andar arbiru sem autorização husi Governo. Ne'e crime! Tanba hala'o sa'san Estado nian la iha autorização, ne'e crime!

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Molok atu continua, iha ponto de ordem ida de'it.

Ha'u fó ba distinto Deputado Joaquim dos Santos atu invoca regimento.

Se faz favor, um minuto.

Sr. **Joaquim dos Santos «Boraluli»** (FRETILIN): — Obrigado, Presidente, bom dia e boas entradas.

Ha'u invoca Regimento artigo 57.º, alínea *f*), atu esclarece de'it situação ida relaciona ho Deputado Natalino nia defesa ne'e.

Todo o ato do Governo tem quer ser nos termos da lei, fora da lei la admite. Ne'e tem que claro. Atu hasai ema, ne'e Constituição fó regra, artigo 54.º n.º 3 ne'e claro, atu hasai ema ida husi fatin ne'ebé nia hela ne'e tem que ser baseia ba lei.

Sociedade agora observa ne'e katak SEATOU ninia atuação ne'e la baseia ba regras, procedimentos ne'ebé iha Constituição ne'e. Trata ema la digno, la tuir lei, ida-ne'e mak ita questiona ne'e, la'ós atu bá contra fali política desenvolvimento. Governo ninia obrigação atu halo desenvolvimento, mas protege cidadão nia moris, ida-ne'e mak Governo la halo ne'e.



Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado. Tuirmai, distinto Deputado Luís Roberto. Se faz favor.

Sr. **Luís Roberto da Silva** (KHUNTO): — Obrigado, Presidente interina.

Bom dia ba Ita-Boot, membro da Mesa tomak, Sr. Vice-ministro dos Assuntos Parlamentares, colega Deputado no Deputada sira, povo doben Timor-Leste.

Ha'u fó nafatin boas festas Tinan Foun ba ita hotu, espera katak tinan foun ida-ne'e bele lori anin fresco ba ita hotu, ba Deputado sira, ba membro Governo sira, e, bele muda ita ida-idak nia fuan para bele serbí povo ne'e ho di'ak, ho fuan ho laran. Selae mak tinan bele troca, maibé hahalok ema nian nunca troca, satán ukun-na'in sira ne'ebé, ita bele dehan, nakonu ho violêncía, ita bele ko'alia.

Iha-ne'e ha'u bele ko'alia katak ha'u mós hakarak concorda ho declaração política Bancada FRETILIN nian, relaciona ho atu muda ita-nia população sira-ne'ebé hela iha mota-ninin iha Fomento II. Claro que membro Governo sira implementa lei ne'ebé iha, maibé ema ne'ebé implementa lei ne'e mak la iha fuan, fuan lakon, ne'ebé considera ema ne'e hanesan loos animal ne'ebé la iha folin. Ita, quando muda ema husi fatin ida bá fatin seluk, precisa cria condição. Ita ko'alia beibeik, maibé Governo ida-ne'e fuan lakon, *otoriter* liu, Governo ida-ne'e.

Depois mai iha Parlamento Nacional, defende malu hodi fó parabéns, parabéns ba sira. Ha'u nunca fó ha'u-nia apreciação ba membro Governo sira-ne'ebé serbisu ho «brutalismo» no vandalismo, hasai liafuan ne'ebé la educado ba ita-nia povo. Ne'e la'ós membro Governo ne'ebé iha qualidade. Ko'alia kona-ba cargo Secretário Estado, ha'u respeita, maibé Germano ne'e ema bandido ida, ne'ebé hasai liafuan la merece ba povo nia oin. Ita tuur iha liderança, povo mak hili ita, mas depois trata povo hanesan filafali animal. Hakilar beibeik iha palco katak ukun ne'e povo nian, maibé, depois de ukun, povo sai filafali imi-nia atan, la sente ukun-an ida-ne'e ninia folin.

Depois, segundo, ba parte saúde nian, quase tinan ida nia laran ne'e besik 700 mak mate, ita-nia população sira. Karik atendimento público mós ladún di'ak ba ita-nia população sira, liuliu iha centro saúde sira hotu-hotu iha município. De vez em quando lori mai iha Hospital Nacional mós todan tiha ona mak hodi mai, e, mai tan iha nacional ne'e mós de vez em quando halo tratamento loron ida-rua de'it haruka ema moras ne'e fila ba uma, depois liu horas rua tolu mate.

Acontece ba iha ha'u-nia família uma laran rasik, molok tama ba Natal no Tinan Foun nian na'in-rua mak mate tuituir malu iha-ne'ebá. Ne'ebe atendimento iha Hospital ne'ebá ne'e ita bele dehan katak la di'ak duni! Mate ne'e sempre mate duni, maibé mate hanesan ne'ebé lai. Husi uma mai di'ak

hela, depois fila ba fraco no mate ne'e mós ita duvida iha-ne'e. Ne'ebe precisa hadi'a sistema atendimento saúde nian ba ita-nia população sira, selae ita koalia hela de'it maka nafatin hanesan ne'e.

Ha'u nunca fiar katak tinan lima nia laran Governo ida-ne'e halo Nação ne'e sai nabilan tiha kedas, ha'u la fiar, ha'u nunca fiar! Tan ne'e precisa cria condição ne'ebé di'ak ba ita-nia povo sira, labele povo sira ho matan-been hela de'it hodi simu ita-boot sira quando tun.

Depois hasai tan liafuan mal-educado ba iha ita-nia povo sira, ne'e ladún di'ak ida! Por exemplo, dehan katak: «ita-boot hakarak hela iha-ne'ebá, hela de'it, ne'e ita-boot nia *urusan*». Ne'e la'ós liderança, ne'e ema bandido sira mak ko'alia hanesan ne'e. Ne'e liafuan ne'ebé la merece ko'alia ba povo, tanba ukun ne'e povo nian, karik ita kaer metin ita-nia compromisso político, ne'ebé hadau povo nia laran ne'e.

Ne'ebe, husi Bancada KHUNTO husu nafatin ba Governo ida-ne'e, osan ne'ebé Parlamento aprova ba ne'e, halo nu'usá para trata povo ne'e ho digno. Programa oioin de'it, orsida atu halo uma digno ba povo, nu'usá mak la cria uluk uma digno ba povo, muda tiha povo ne'e ba iha uma digno ne'e mak foin sobu sira-nia uma? Ita-Boot sira-nia programa ne'e *gado-gado* liu, mas implementação nunca! Ha'u la fiar ida atu acontece ida-ne'e.

La kleur tan 2026 no 2027 ne'e tama ona ba ano político. Ha'u la fiar atu buat hotu sai milagre iha-ne'e. Ne'ebe iha tempo udan hanesan ne'e ita trata povo ne'e tem que ho digno uitoan, labele ita duni povo hanesan fali animal ne'ebé la folin ba ita. Ita labele gabasola an iha povo nia terus no matan-been nia leten, ne'e problema boot, ne'e desenvolvimento nunca la'o. Natureza ne'e sei julga ita iha tempo ida.

Ne'ebe ha'u hakarak fó-hatene bai Ita-Boot sira: Defende buat ne'ebé loos! Contra buat ne'ebé la di'ak!

Ba filafali foin maluk Deputado balu ko'alia kona-ba maluk moras mental sira, ida-ne'e Bancada KHUNTO questiona beibeik. Husu para Bancada Governo, husu filafali ba Ita-Boot sira-ne'e, bele atende filafali, tanba ami oposição mak ko'alia de vez em quando la bele rona, agora Bancada Governo mak husu filafali, fiar katak bele tau iha implementação para bele trata ita-nia maluk sira-ne'ebé la'o tesik Díli laran ne'e, balu la'o molik de'it ne'e, bele atende sira ho di'ak para bele tau iha fatin ne'ebé seguro ba sira.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigado, distinto Deputado.

Molok atu continua, iha ponto de ordem rua.

Distinto Deputado Natalino dos Santos.

Se faz favor, um minuto.

Sr. **Natalino dos Santos Nascimento** (CNRT): — Sim, ha'u foti ponto de ordem atu esclarece ba Sr. Deputado Joaquim, katak evicção ida halo daudauk ne'e iha causa.

Além disso, antes ne'e processo ne'e Governo halo tiha ona. Ida-ne'e processo. Agora, se ema ba hela arbiru de'it, tanba Constituição hateten mak ita husik de'it, depois Governo labela ordena? Governo iha competência, Governo mak gestor de Estado atu haree rai, lalehan ho buat ne'ebé iha Estado República Democrática de Timor-Leste ne'e, ne'e competência Governo nian atu haree, atu tau iha ninia fatin.

Loos, Governo ne'e la bele halo milagre halo cidade sai nabilan, mas iha dever, continuação. Karik CNRT começa bá, iha 2028 colega sira povo fó fiar fali, Ita-boot sira continua buat sira-ne'ebé di'ak. Agora ita questiona, buat ne'e iha causa hela ne'e? Ita hotu preocupa ordenamento território, be Díli ne'e arbiru de'it ne'e? Então, Governo sé mak atu halo?

Lei iha tiha ona, iha 2008 iha tiha ona lei ne'e, husi Governo consegue halo. IX Governo implementa. Lei iha hela ne'e? Ita hotu ta'uk ne'e...

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Sr. **Natalino dos Santos Nascimento** (CNRT): — E agora usa legalidade ne'ebé iha para hodi halo, dehan fali Governo la iha legalidade, autoridade atu halo ne'e. Então nu'udar gestor de Estado ne'e atu bá halo saida? Ninia obrigação mak ida-ne'e.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigado, distinto Deputado.

Tuirmai, ponto de ordem, distinta Deputada Cedelízia dos Santos.

Sr.<sup>a</sup> **Cedelízia Faria dos Santos** (CNRT): — Muito obrigada, Presidente.

Uluknanain, ha'u hakarak secunda saida mak distinto Deputado Natalino ko'alia, e, ha'u hakarak acrescenta liután tanba ita-nia Secretário de Estado dos Assuntos da Toponímia e da Organização Urbana halo serbisu tuir hela lei.

Iha Decreto-Lei n.º 33/2008, no altera ona iha dia 17 janeiro de 2024 ho Decreto-Lei n.º 3, significa ita-nia Secretário de Estado halo serbisu tuir hela decreto-lei no lei sira-ne'ebé iha vigor. Harii Secretário de Estado dos Assuntos da Toponímia e da Organização Urbana ne'e ninia intenção hodi hadi'a buat sira-ne'e. Ida-ne'e liuhusi mós orgânica Governo nian. Ita mós aprova orçamento ba Secretário de Estado dos Assuntos da Toponímia nian iha Parlamento Nacional ida-ne'e, ne'e tau iha lei, katak saida mak halo ne'e cumpre hela requisito legal sira. E Secretário de Estado mós fila-fila hateten katak nia informa tiha ona ba ita-nia comunidade sira ne'e antes, quase tinan ida, depois mak

bá hasai. Ne'ebe la'ós tur-tur bá halo ida-ne'e, la loos! Ha'u hanoin, ita hotu acompanha hela iha mília.

Ida tan mak, ne'e ikusliu, ita dehan katak «ema seidauk mate». *Emangnya* ita hakarak ema mate tiha mak ita bá hasai ema ka? Ema sei moris hela ne'e mak ita ba protege, ita-nia comunidade sira.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada.

Sei iha ponto de ordem, ha'u la fó ona, tanba iha inscrição sei naruk hela.

Tuirmai, distinto Deputado Virgílio Pereira.

Se faz favor.

Sr. **Virgílio Pereira** (CNRT): — Di'ak, obrigado ba biban.

Ha'u-nia respeito ba Presidente interina, composição da Mesa, e la haluha ha'u-nia respeito mós ba colega distinto e distinta Deputado sira hotu, la haluha ha'u-nia respeito mós ba iha Vice-Ministro dos Assuntos Parlamentares.

Iha dadeer kmanek ida-ne'e, hahú hakarak hato'o ha'u-nia boas festas do Santo Natal e bom Ano Novo ba ita hotu no ba povo doben Timor-Leste tomak.

Iha início intervenção ida-ne'e ha'u hakarak reforça nafatin, liuliu estrada urbana iha Município Baucau, ne'ebé ninia orçamento ne'e prevê tiha ona, mas até agora ne'e seidauk bele book. Ninia problema iha-ne'ebé? Ninia causa ne'e saida? Tanba, depois de comunidade coopera di'ak, muda tiha mercado husi Kota Lama, to'o Kota Lama ne'e muda sai hotu, muda fali mai leten ne'e, precisa estrada ida di'ak, mas estrada ne'e quando tempo udan ne'e pior liu, kuak ida que aat demais. Tanba ne'e precisa tebes atenção husi Ministro das Obras Públicas, relaciona ho orçamento ne'ebé prevê ona. Tanba ne'e precisa hetan informação.

Segundo, hakarak usa oportunidade ida-ne'e atu fó atenção nafatin ba Ministro das Obras Públicas para bele bolu ona companhia internacional ida ho naran Norinco, ne'ebé kaer obra estrada husi Laga to'o Baguia ne'e, la iha qualidade tebes compara ho companhia ida ne'ebé kaer obra estrada husi Quelicai Mumana nian ba to'o iha Laisorulai ona, e estrada horas ne'e daudauk comunidade utiliza ona, só único husi Laga bá Baguia ne'e quase, ita bele dehan, la la'o. Foin daudauk monta tiha *base course*, husi Laga ba to'o ona Lalai, mas depois ida-ne'e la iha continuação ida di'ak, então tempo udan ita bele dehan katak estrada husi Laga bá to'o iha Lalai ne'e quase estraga tomak hotu kedas ona, tanba ne'e precisa bolu atenção. Se companhia ida-ne'e la iha capacidade financeira, se bele karik Governo selu ona ninia serbisu ne'ebé iha, mas bele haree fali companhia seluk para bele kaer filafali estrada ida-ne'e, tanba comunidade iha posto administrativo rua ne'e mós iha direito atu hetan acesso ba estrada ida-ne'ebé di'ak.

Tuirfilafalimai, hakarak, liuhusi biban ida-ne'e, husu ba Ministro da Administração Estatal para bele haree questão ida que horas ne'e daudauk acontece iha posto antigo Quelicai nian ne'ebé foun. Iha suco rua ne'ebé antes ne'e iha hanoin katak sira prefere integra ba iha Posto Administrativo Quelicai Vila, mas depois de iha negociação ne'e comunidade ninia exigência ne'e la to'o mai iha Ministro, no fim suco rua, liuliu Abafala ho Suco Waitame, ne'ebé tuir loos ne'e besik liu ba posto vila nian, integra filafali ba iha posto antigo ne'ebé foun. Significa katak, quando ba posto antigo ne'e, nia ultrapassa por volta de mota lima ida hanesan ne'e, e ninia distância ne'e por volta de 13 km, ne'e quer dizer que dook tebes. Maibé, compara ho posto vila, ne'e sira iha por volta de dois até três quilómetros de'it. Então, comunidade iha-ne'ebá ne'e hakarak mak bá iha posto vila, tanba ne'e mak antes de dezembro, Deputada Helena mós questiona assunto ida kona-ba assinatura ne'e à rasca uitoan ne'e tanba ida-ne'e, tanba comunidade suco rua ne'e lakohi atu integra ba iha posto antigo ida foun ne'e.

Tuirfalimai, ha'u passa férias ne'e ultrapassa fronteira uitoan, mas hakarak hateten katak iha lamentações balu husi funcionário destacado DNTT nian iha fronteira, tanba sira-nia subsídio alimentar ne'e quase tinan ida fulan neen ona seidauk selu. E hakarak husu nia razão fundamental tanba saida mak la selu to'o agora. Husu ba Ministro dos Transportes e Comunicações atu justifica hela ida-ne'e mai.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Lídia Norberta.

Se faz favor.

Sr.<sup>a</sup> **Lídia Norberta dos Santos Martins** (FRETILIN): — Obrigada, Sr.<sup>a</sup> Presidente em exercício e Vice-Presidente.

Ami hato'o ami-nia votos de continuação de bom Ano Novo nafatin ba ita, ba Mesa, ba colega Deputado sira, ba maluk rona-na'in sira, povo doben Timor-Leste no mós ba Sr. Vice-Ministro.

Iha biban ida-ne'e hakarak apoia nafatin ami-nia declaração política Bancada nian relaciona ho evicção ida-ne'ebé halo la tuir regra.

Loos duni, ita hotu-hotu aceita tem que iha duni ordenamento do território, maibé ordenamento do território ne'ebé iha-ne'e povo hotu-hotu tem que hatene kona-ba saida mak Governo atu halo. Por exemplo, ba iha espaço público hanesan tasi-ninin ne'e saida mak Governo halo depois de hasai povo sira. Karik mak iha *perluasan* dalan ruma ne'ebé afeta, hanesan agora daudauk iha Manleu mós iha, uma balu sei afetado bainhira ita halo *perluasan* dalan, ida-ne'e povo tem que hatene. Problema ne'e

mak, hanesan ohin dehan ne'e, ita halo ne'e halo vandalismo duni, Sr. Secretário de Estado ne'e halo política ida que hakarak dehan halo buat loos, maibé to'o ikus hala'o halai sala tiha husi lei ne'ebé iha.

Ha'u atu fó-hanoin de'it, iha nível mundial, iha 2007 iha carta ida naran Carta Mundial pelo Direito à Cidade, iha-ne'ebá hateten, iha carta ne'e, tanba saida mak mosu. Mosu tanba iha país barak hakarak halo desenvolvimento ba nia rain, liuliu iha cidade metropolitana sira, capital da nação sira-ne'e, maibé sempre halo evicção ne'ebé prejudica povo barak. Tanba ne'e mak líder mundial sira mós halo carta ida naran Carta Mundial pelo Direito à Cidade para nune'e, duni ema karik labele duni ema hanesan Sr. Secretário de Estado halo ne'e, duni ne'e respeita regras. Respeita regras ne'e mak antes duni ema, hanesan mós Sr. Deputado Calau ohin dehan ne'e, mesmo que ita informa sira ona maibé ita tem que cria fatin. Nu'usá mak VIII Governo bele halo, cria fatin para lori população sira-ne'e bá hela tiha depois mak identifica fali fatin seluk, IX Governo la bele fó continuidade ida-ne'e? Satán ohin dehan katak tem que continuidade. Se continuidade, então ida VIII Governo halo ne'e di'ak, tanbasá mak la continua? Ita podia Nação la'o ba oin lae, ita halai fali bá kotuk.

Ida seluk, dehan respeita regras ne'e halo hanesan ne'e, mak ida VIII Governo halo ne'e, halo tuir lei, katak artigo 58.º dehan direito ba habitação, loos duni, «wainhira imi ocupa espaço público ami tem que hasai imi, maibé ami hasai imi hanesan ema, ami la'ós hasai imi hanesan animal. Tem que ba tau duni iha fatin ida imi hela lai bá depois mak buka fali fatin seluk». E iha VIII Governo mós identifica rai ida iha Hera para halo ida-ne'e, ita balu mós contra, ida-ne'e nia intenção atu cria condição di'ak ba ita-nia população sira.

Agora, ita mai, ita duni arbiru de'it. Sr. Secretário Estado SEATOU brani duni quando duni população ki'ik sira-ne'ebé iha, mas quando Secretário Estado SEATOU, ha'u foti beibeik iha Plenária kona-ba Liquiçá nian, por exemplo, se ita hakarak halo justiça ba ema kiak ho ema rico iha direito hanesan ba rai, iha rai iha Liquiçá, rai público ne'ebé Sr. Rai Loos usa iha ponte sorin mercado Maumeta nian ne'e, ne'e rai público, ha'u foti iha Plenária, ha'u husu ba Sr. Secretário de Estado SEATOU, Sr. Secretário de Estado la brani atu foti, tanba de'it Ita-Boot nia ema militante CNRT. Ita aplica lei ne'e dehan katak povo ne'e tem que halo tuir: «imi, tanba hela iha mota sorin be duni-sai», ne'e loos, tanba sira hela, maibé cria fatin. Be agora ida-ne'ebá be ocupa hela espaço público ne'e, ne'e tanba de'it imi-nia militante imi la bá halo, ne'e justiça iha-ne'ebé? Agora nia aterra rai iha-ne'ebá atu halo uma *petak-petak*, atu fó china sira aluga, osan. Agora ha'u husu: rai Estado ne'e Estado buka ka lae atu fó receita, halo rendimento ba Estado? Se agora ema ida bá controla hanesan ne'ebá, tanba de'it ita hotu-hotu luta be agora ita nonook de'it ka? Ita-nia maluk ne'e quando halo sala, dehan! Ha'u mós hasoru nia iha Liquiçá ha'u hateten, labele ne'e! Rai público ida ita lakohi saida...

Agora, ida fali tan rai sira *aset* Estado nian, rai militar sira, ex-messe militar sira, por exemplo.

Ida ha'u foti beibeik iha Plenária, iha Tribunal Distrital Díli nia sorin ne'e, ema privado ida mak usa iha kotuk ne'e halo *petak-petak* fó aluga. Justiça ne'e iha-ne'ebé? Povo ki'ik sira ita duni, agora, sira ne'ebé, tanba iha interesse seluk ita la duni ida? Ne'e injustiça, ne'e sala!

E iha VIII Governo, iha 2022, Governo mós cria ona Decreto-Lei n.º 9/2022 kona-ba Regime Jurídico da Edificação e Urbanização, tanbasá mak ita la fó continuidade ba ida-ne'e?

Ohin maluk Deputado sira dehan fó continuidade. Se fó continuidade, então sei la implementa sala hanesan ida agora ne'e, tanba la fó continuidade ne'e mak buat ne'e sala barak loos tiha de'it ne'e. Ne'e realidade!

Ne'ebe ita, quando ko'alia kona-ba ida-ne'e, pelo menos tem que iha duni buat ida socialização ne'e di'ak, sá plano mak Governo hakarak halo ba cidade Díli, tanba ema hotu-hotu hakarak halo ordenamento do território.

VIII Governo halo ida-ne'e, maibé agora Ita-Boot sira lakohi fó socialização, tem que ser intensifica lei ida-ne'e ba população sira liuhosi mídia, liuhosi *face to face* ho população iha nível suco sira, depois mak ema bele hatene. Agora *rentetan*, halo tiha ida-ne'ebá, Primeiro-Ministro bá defende, ida seluk dehan labele hasai, contra tiha lei. E depois, quando mai halo fali, ba loke estrada, loke conforme hakarak de'it, ema la hatene sá ordenamento mak atu halo, hanesan buat ne'e ba duni de'it, duni de'it, ordenamento ema la hatene, ema la hatene Díli ne'e atu sai halo nu'usa, ne'e ema la hatene ida. Problema mak ida-ne'e.

Ne'ebe vandalismo ne'e *memang* Sr. Secretário de Estado halo vandalismo duni, e, se nia la halo vandalismo mak buat sira ami foti iha Plenária kona-ba rai Estado sira-ne'e mós nia ba intervém. Nia la intervém ne'e?

Obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado Anacleto Freitas.

Se faz favor.

Sr. **Anacleto Freitas** (CNRT): — Obrigado ba tempo.

Ha'u-nia respeito ba Presidente do Parlamento em exercício, composição da Mesa, Vice-Ministro dos Assuntos Parlamentares, colega Deputado no Deputada sira hotu, ba assessor sira, mídia sira, técnico sira no povo Timor laran tomak mak ha'u hakru'uk, bom dia.

Ha'u hakarak atu foti, foin daudauk férias ne'e ha'u bá Viqueque, ha'u hasoru ita-nia população sira iha-ne'ebá hato'o hela mai ha'u hanesan ne'e: «escola SMA (*Sekolah Menengah Atas*) ida iha Ossu, escola ne'e nia naran Olokasa, iha Suco Uagua, existe ona tinan tolu, momento iha VIII Governo nia

tempo ne'e mak harii, maibé diretora ne'e hakarak hapara fali», ne'ebe ha'u hato'ó hela ba Vice-Ministro para bele anota hela atu nune'e bele hato'ó ba ministério relevante.

Segundo, ha'u hakarak atu ko'alia kona-ba escola ida tan iha Nahareka, ne'e *SMP (Sekolah Menengah Pertama)* ida, mas ne'e cadeira ho mesa mak la iha liu, depois escola ne'e mós kuak hotu, ne'ebe, karik bele, hato'ó hela ba ministério relevante para bele bá haree.

Terceiro, ha'u hakarak atu ko'alia kona-ba – ne'e ha'u foti dala barak ona iha-ne'e – estrada, Ponte Welolo. Ha'u la hatene, Ministro ida-ne'e, nia bá sobu tiha tau emergênciá, mas to'ó a data nia continuação ne'e la iha. Ha'u sempre tun ba hasoru ita-nia população, sira hato'ó hela beibeik mai ha'u, nune'e ha'u foti iha-ne'e dala barak ona. Nia sobu hela tiha agora parado, companhia mós la iha-ne'ebá, agora mota tun la tuir ninia dalan, maibé tuir fali estrada ne'e, ema isin-rua de'it atu lori bá hospital mós la di'ak karik mota tun. Nune'e mós população ne'ebé hela iha mota sorin, atu lori ninia produto local ba mercado mós la bele. E nune'e, mota tun karik dala ruma labarik sira atu bá escola mós à rasca hotu. Tanba ne'e ema fó-hatene mai ha'u, ida-ne'e mak ha'u hato'ó.

Ida tan mak ponte iha Lacluta, Suco Uma-Tolu, ne'e ponte kotu tiha ona, IGE (Instituto de Gestão de Equipamentos) sira-nia serbisu halo nu'usá, ha'u la hatene. Ne'e ha'u foti dala barak ona iha-ne'e, mas, karik bele, ida Alito ne'e imi la rona la iha buat ida, mas pelo menos, ha'u, nu'udar matan, tilun noibun ba povo Viqueque, ha'u ko'alia ne'e imi rona netik bá, selae, ha'u hanoin, orsida ita bele defende, defende, mas dala ruma sala mós iha, tanba ne'e ha'u foti dala barak ona iha-ne'e, ba problema rua ne'e. Se la halo, então lalika sobu ida para fó oportunidade ba ema atu liu, sobu tiha to'ó a data companhia mós ninia *gudang* ka saida ne'e la iha-ne'ebá, agora la'ó lakon tiha, ha'u nunca haree companhia nia existênciá iha-ne'ebá. Ne'e mak, bele karik, Vice-Ministro bele alista hela atu nune'e bele hato'ó ba Ministro das Obras Públicas para bele haree, selae ida-ne'e orsida ita defende, defende, mas buat ida ita defende mós buat sala ida.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Ângela Maria Corvelo Sarmento.

Se faz favor.

Sr.<sup>a</sup> **Ângela Maria Corvelo Sarmento** (CNRT): — Obrigada ba Presidente em exercício.

Bom dia ba Mesa no componente tomak, Vice-Ministro dos Assuntos Parlamentares, ba colega Deputado sira, mília, haree-na'in no rona-na'in sira.

Dala ida tan ha'u hakarak hato'ó ha'u-nia boas festas e boas entradas ba Tinan Foun 2025, ne'ebé lori esperança no karik fó presente di'ak ida mai Timor-Leste.



Segundo, ha'u hakarak fó ha'u-nia parabéns, mesmo sei iha passo início, ba Governo atual no Governo Austrália ne'ebé concorda atu viabiliza desenvolvimento *Greater Sunrise*, ne'ebé loke dalan mós ba kadoras dada mai Timor-Leste. Hakarak agradece, la'ós de'it ba IX Governo ida-ne'e, maibé mós ba líder histórico sira hotu husi partido oposição, ne'ebé fó sira-nia contribuição uitoan ka barak hodi concretiza compromisso político atu lori kadoras mai Timor-Leste.

Agradece mós ba povo tomak ne'ebé fó fiar ba CNRT hodi lidera Governo ida-ne'e, hodi bele fó esperança foun kona-ba *Greater Sunrise* nian. Dala ida tan, parabéns!

Terceiro, ha'u secunda ha'u-nia companheira Lízia Santos kona-ba merenda escolar.

Sr. Vice-Ministro, dala barak, quando ita-nia exigência, ita-nia direito ita la simu, ita halo protesto, ita hakilar oioin, maibé, quando labarik sira-nia direito la cumpre, ema hotu-hotu nonook e labarik sira terus. Ha'u ko'alia tanba kona-ba merenda escolar ne'e quase tinan-tinan, fulan tolu, desde janeiro to'o março labarik sira la han merenda escolar, e dala barak mós orçamento filafali ba Estado tanba la bele usa.

Ha'u husu ba Governo atu iha esforço ka alternativa seluk, por exemplo, contrata companhia sira ne'ebé bele halo serbisu antes de sira simu pagamento. Ha'u hanoin, município balu implementa daudauk ona, sira contrata companhia local sira atubele fornece merenda escolar ba aluno sira hodi nune'e aluno sira labele sofre fali ho burocracia ne'ebé la'o daudauk. Ha'u dehan burocracia tanba ita aprova orçamento, ita ansi desde setembro, outubro, ita discute Orçamento Geral do Estado para bele apressa execução orçamento, mas to'o agora ita seidauk rona. Ha'u espera katak Vice-Ministro bele informa kona-ba implementação OGE 2025 nian.

Segundo, ha'u hakarak fó-hanoin mós, liuliu ba instituição PNTL (Polícia Nacional de Timor-Leste), iha tinan kotuk ami bá hakoi mate, ha'u hakfodak uitoan tanba membro PNTL mós hakoi iha cemitério público. Ita hatene katak F-FDTL (FALINTIL-Forças de Defesa de Timor-Leste) iha cemitério próprio ba sira, tanbasá polícia nacional la iha?

Ha'u husu ba Governo atu halo tratamento hanesan ba ita-nia força segurança nacional nian, tanba sira hotu-hotu fó sira-nia contribuição, sira hotu-hotu mós fó sira-nia dedicação tomak ba ita-nia Rain, tanba ne'e, sira mate mós sira precisa fatin digno ba sira. Tan ne'e husu ba Vice-Ministro, favor ida, hato'o to'ok ba Governo ne'ebá atu concede mós fatin digno ba sira atu sira bele descansa iha hakmatek.

Ha'u mós fó-hanoin, iha cemitério sira-nian oin ne'e sempre cria tráfico, liuliu quando ema mate, ita atu bá hakoi. Ha'u fó-hanoin, se bele karik, iha Cemitério Becusi, cemitério sira iha fatin seluk ne'ebé iha possibilidade, halo única via ou halo regulação de horário para carreta bele única via iha tempo ne'ebé ocupado, iha tempo ne'ebé *busy* ita halo tiha única via, e tempo ne'ebé livre ita bele halo carreta bele ba mai, nune'e minimiza tráfico público.

Ha'u mós husu ba Vice-Ministro, iha cruzamento Ai-Mutin ne'e dala barak *macet* tebetebes, *macet* tanba ita la iha paciência ba malu, ita lakohi hein, ita corta ba malu no fim cria tráfico ne'ebé horas ba horas. Tanba ne'e husu ba Governo, se bele, monta *traffic light* iha-ne'ebá hodi nune'e bele minimiza tráfico iha área Elemloi no Ai-Mutin, nune'e bele facilita transporte atu di'ak liután.

Ikusliu, ha'u hakarak fó ha'u-nia apreço, ha'u-nia reforço nafatin ba SEATOU (Secretário de Estado dos Assuntos da Toponímia e da Organização Urbana) atu continua hala'o nia serbisu. Sim, fiar katak desenvolvimento sempre iha vítima, e dala barak liu vítima sira-ne'e mai husi povo ki'ik, ha'u fó simpatia ba sira, solidariedade, maibé infelizmente desenvolvimento tem que la'o, e SEATOU tem que halo nia serbisu duni hodi salva ema barak nia vida. Karik iha 600 mak sai vítima, maibé ema barak liu mak bele salva. Ha'u fiar katak SEATOU mós triste, SEATOU mós tanis quando nia muda ema, maibé nia tem que halo duni, tanba cidade ne'e tem que ordena.

Ha'u husu ba Governo, se bele karik, tinan oin tau fali orçamento ba indemnização ne'ebé boot liu hodi nune'e evicção hotu-hotu ita bele fó orçamento, e ita labele critica kona-ba precipício orçamento ne'ebé sempre mosu iha Plenária ne'e.

Muito obrigada, Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado José da Cruz.

Faz favor.

Sr. **José da Cruz** (FRETILIN): — Dala ida tan, obrigado ba Presidente em exercício.

Ha'u hakarak reforça tan declaração bancada nian, ne'ebé atan ha'u rasik lê. Atu hatete katak despejo ne'ebé halo, demolição massiva iha Fomento ne'e, ha'u haree katak Sr. Secretario de Estado ne'e la'o hanesan la'o ba de'it, bá para hodi máquina sira hodi baku rahun de'it povo nia uma ne'ebé harii iha tinan barak nia laran. Imagina, 288 casas ne'ebé baku rahun, ne'e milhão hira mak bá tiha ona ne'e? E ema hira mak lakon nia rendimento, lakon nia tempo, lakon nia energia, labarik sira sofre. Ne'e violação direitos humanos, direitos humanos ne'ebé loloos Estado ka Governo ne'e tem que protege. Lae! Governo ne'e rasik halo violação ba sira. Até sira-nia propriedade rasik ne'e ita considera hanesan violação boot ida, massiva!

Imagina, uma sira ita haree husi ponte leten tun ba mota laran to'o mai *bronjong* leten sira-ne'e, ne'e ema construi tinan barak, maibé máquina ba baku horas ida nia laran de'it mohu, ita-nia fuan lakon. Ida-ne'e mak imagem husi Timor be hatudu ba mundo dehan desenvolvimento ne'e tem que la'o para sacrifica uluk povo, depois cada tinan lima ita ba hais, ba exige sira-nia votos, filafali mai dehan «desenvolvimento tem que la'o mesmo que ki'ik sira sai vítima». Hae, ita tau ema mak centro

ba desenvolvimento ka desenvolvimento mak tem que la'ó uluk, tem que sacrifica fali povo? Ita tem que lamas ita-nia kanuruk, loos ka sala método ne'ebé ita aplica usa ba halo despejo ne'e?

Ha'u hanoin, se Sr. Secretário Estado la iha *SOP (Standar Operating Procedure)* ida karik, se bele ninia equipa sira tulun nia para desenvolve netik *SOP* ruma bá, baseia ba Constituição, artigo 44.º, no mós ba Lei Orgânica SEATOU nian, haree didi'ak lai! Tanba saida mak nia tun runguranga de'it hanesan ne'e?

Emá hasé nia la'ós foin ne'e, hahú kedas husi Bidau, Díli laran, Ai-Tarak laran, mai to'ó agora, nia nafatin ho método serbisu ida hanesan ne'e. Ne'e mak, dala ruma, Deputado sira carimba nia ho «brutalismo» ne'e loos, tanba la iha método serbisu ida que di'ak. Loloos ne'e nia tem que iha *SOP* ida que di'ak. La iha *SOP*, ó la'ó runguranga bá de'it?

Imagina ki'ikoan sira-nia situação, oan sira ne'ebé afetado husi despejo ne'e, labarik sira kalan la bele estuda, tanba la iha hela fatin; inan-aman sira kalan la iha intimidade que di'ak, tanba la iha fatin. Ne'e emá nia direito. Ida-ne'e mak Governo ida-ne'e defende ka? Ida-ne'e mak Deputado sira defende ka? Violação ida hanesan ne'e.

Ita ko'alia to'ok ba direitos humanos ne'ebé loloos, direitos humanos ne'e ita tem que protege emá nia direito, la'ós dehan atu a favor de'it companhia ida Salimago ninia projeto tem que sacrifica povo sira iha ponte okos ne'ebá ne'e.

Ha'u hatene katak projeto ne'e cinco milhões e tal ida hanesan ne'e, tanba ne'e mak tem que muda povo sira husi ne'ebá, ne'ebe ita haree loloos la iha urgência. Se ida-ne'e urgência, parece buat ne'e tem que iha plano ida que di'ak. Ne'e tanba de'it companhia ne'e atu halo ninia muro ida husi dalan sa'e ba Kasnafar tun mai ne'e, companhia ida-ne'e mak kaer obra ne'e. Tanba emá sei hela iha-ne'ebá, então aproveita política despejo ne'e baku rahun hotu povo nia uma. Coitado, ne'ebá ne'e ita ko'alia, povo ki'ik mas nia contribui ba desenvolvimento Rai ida-ne'e. Se economia forte ne'e sira mós tem que contribui mak ne'e.

Café Atsabe, ne'ebé Presidente da República antes ne'e bá visita, contente la halimar, antes de halo demolição, Presidente da República mós questiona, maibé máquina boot bá ne'e la *kompromi* ho Presidente nia lamentações.

Ha'u hanoin, ida-ne'e mak ha'u hakarak reforça bancada nia declaração.

Obrigado barak, Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Saul Salvador.

Se faz favor.

Sr. **Saul Salvador H. J. Amaral** (CNRT): — Obrigado ba tempo.

Sr.<sup>a</sup> Presidente interina ho Mesa, Ex.<sup>a</sup> Vice-Ministro dos Assuntos Parlamentares, colega Deputada e Deputado sira, mídia e povo doben Timor-Leste, uluknanain ha'u-nia continuação de boas entradas ba Ano Novo 2025 ba ita hotu.

Bem, ha'u hanoin, depois de rona tiha declaração política Bancada FRETILIN nian, presença SEATOU nian ho equipa iha fatin evicção, ha'u hanoin katak ida-ne'e ho objetivo atu salva povo ida-ne'e husi risco.

Iha semana kotuk, la sala iha dia 3, ita hotu-hotu acompanha, udan boot, e acompanha iha mídia social, mota boot tebetebes e hamosu inundação, ita-nia cidadão sira ne'ebé hela iha ponte okos sai afetado. Tanba ne'e Governo haree katak ida-ne'e hanesan risco boot ba cidadão sira-ne'ebé hela iha ponte okos, tanba ne'e mak presença SEATOU nian, ha'u, hanesan Bancada Governo nian, haree katak ne'e objetivo atu salva nia povo husi risco refere.

Segundo, atu organiza ona mós ita-nia cidade Díli, hodi nune'e bem organizado husi cidadão sira ne'ebé ocupa espaço público. Loos duni, cidadão hotu iha direito atu hela iha capital, maibé la'ós ocupa fali espaço público no hela fali iha ponte okos, ne'ebé fó risco ba sira-nia vida. Quando povo ida lakon vida, Estado mak lakon, tanba ne'e ha'u apoia SEATOU ho equipa. Continua imi-nia serviço hodi salva ita-nia povo!

Povo doben Timor-Leste, direito ba rai no espaço ba negócio importante ba cidadão hotu-hotu, tanba rai iha função social no económica. Mesmo nune'e, Estado fotei papel ba gestão rai atu garante katak utilização rai bele fó impacto positivo ba desenvolvimento, tuir princípio equitativo no interesse público nian.

Liga ho polémica agora, despejo administrativo ka evicção iha Município Díli, ita haree katak acontece tanba to'o ona nível desordem pública, ema barak comete violação ba ordenamento do território. Ita continua ocupa rai arbiru de'it, halo com que Díli sai desorganizado, inundação iha fatin-fatin, engarrafamento, perturba ema la'o ain, crime mosu barak no falta área captação bee udan.

Desde tinan 2012, Governo halo despejo administrativo ka evicção ba população sira-ne'ebé ocupa rai Estado nian, exemplo, área Caicoli, BOP Bairro Pite, tasi-ibun, inclui Bidau, etc.

Governo halo ona processo coordenação no comunicação iha tinan barak ho ocupante sira, família hotu-hotu simu compensação atubele integra hikas ba sira-nia hela fatin origem.

IX Governo Constitucional iha ninia programa mak hadi'a situação ne'e, enfatiza desenvolvimento sustentável hodi bele alcança equilíbrio entre crescimento económico, bem-estar social e sustentabilidade ambiental hanesan abordagem holística ida ba cidade Díli.

Díli la'ós sai de'it centro administração ka capital Nação no economia, maibé tem que sai mós fatin moris ba ema hotu ho seguro no higiene. Iha rai barak, capital nação prioridade ba desenvolvimento,

nune'e precisa atu reorganiza no tem que halo prevenção ba ocupante rai Estado. Objetivo loloos mak hasa'e qualidade moris ba ninia povo tomak.

Bancada CNRT consciente ho preocupação ita-nia população sira-nian. Ami la taka matan, ami continua buka meio hotu-hotu, ami hadi'ak daudaun espaço ba negócio no integra hikas população sira ba município, hodi dehan katak ordenamento território ba interesse desenvolvimento nian, hodi facilita ema hotu para Governo fácil halo canalização bee moos, eletricidade no estrada. Além de ne'e, ordena esgoto hodi previne inundação bainhira volume udan-been boot.

Apela ba povo tomak...

Sr.<sup>a</sup> **Presidente** (Maria Terezinha da Silva Viegas): — Por favor, conclui, Deputado!

Sr. **Saul Salvador H. J. Amaral** (CNRT): — ... Sr.<sup>a</sup> Presidente, mais um minuto para concluir...

Sr.<sup>a</sup> **Presidente** (Maria Terezinha da Silva Viegas): — Um minuto é muito!

Sr. **Saul Salvador H. J. Amaral** (CNRT): — ... atu colabora ho IX Governo Constitucional, fiar metin Primeiro-Ministro, Maun Boot Kay Rala Xanana Gusmão, ho nia governante sira, hodi hadi'ak ninia País.

Husu atu colabora no tem que fiar metin hodi hateke ba oin ba Timor-Leste ida ne'ebé heróis no mártires libertação nacional mehi atu atinge. Ita tem que ordena didi'ak capital Díli hodi bele evita exploração excessiva ba natureza ne'ebé sei estraga ambiente ho massivo no nia risco ita hotu mak sei simu.

Tanba ne'e ha'u husu ba SEATOU ho equipa, kaer metin moto «*Fiar an La'ó ba Oin*» bainhira povo ho nação nia bem-estar atu organizado di'ak.

Obrigado, Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada.

Tuirmai, Distinta Deputada Sância Paixão Bano.

Se faz favor.

Sr.<sup>a</sup> **Sância Florência Paixão Bano** (FRETILIN): — Obrigada barak ba tempo.

Sua Excelência Presidente do Parlamento Nacional em exercício, componente da Mesa, distinta no distinto Deputado sira, membro do Governo sira, Buibere no Maubere sira, mídia, bom dia ba ita hotu.

Antes ha'u halo intervenção ba assunto rua ka tolu iha-ne'e, ha'u hakarak hato'o ha'u-nia boas festas do Santo Natal e feliz Ano Novo ba ita hotu, espera iha tinan foun ida-ne'e bele hamosu hanoin foun, hodi bele construi Rai ida-ne'e ho di'ak.

Maubere no Buibere sira, ha'u hakarak secunda tan declaração Bancada FRETILIN nian, katak cidadão hotu-hotu iha direito hanesan atu moris ho digno no livre iha República Democrática de Timor-Leste, tanba ne'e labele husik balu moris susar, iha grupo balu de'it mak goza iha ukun rasik-an ida-ne'e.

Ita hotu hatene no haree direta iha mídia social ne'ebé espalha katak política SEATOU ne'ebé halo evicção iha Díli laran, ida-ne'e considerado ação ne'ebé la humana, ne'ebé la iha duni *rasa kemanusiaan*, tanba ne'e estraga comunidade sira-nia hela-fatin maibé la iha política integrada hodi bele cria condição ho digno ba comunidade sira.

Díli, sai hanesan capital nação RDTL nian, precisa duni sai cidade ida furak no bonita, nune'e precisa duni halo desenvolvimento no ordenamento território, maibé, ita labele sacrifica fali povo ne'ebé kbiit la iha. Povo sira sei sofre ba política ordenamento território ne'ebé la integrado tanba Governo la prepara condição ida antes atu sobu povo nia hela fatin. Governo la halo estudo ho di'ak, maibé usa de'it força ba duni comunidade, hasai ema husi condição ne'ebé iha, ne'ebe la digno.

Ida-ne'e sá política? Obriga comunidade tem que fila hikak ba ninia fatin ida-idak iha município no estraga labarik sira-nia futuro, estudante sira barak mak sei lakon sira-nia escola. IX Governo halo evicção ho radical ne'e taka povo ki'ik nia oan sira atu hetan acesso ba escola, estudante universitário sira la hatene atu bá hela iha-ne'ebé hodi continua sira-nia estudo, maibé ita hotu haree no hatene ida-ne'e, loos duni, Governo nia governante ida-ne'e la preocupa sofrimento hirak ne'ebé povo ko'alia.

Ho ida-ne'e ha'u continua. Iha novembro no dezembro, fim do ano 2024 ne'e, Oe-Cusse RAEOA rame tebes ho evento oioin, sa'e avião Díli Oe-Cusse, Oe-Cusse Díli, tun husi avião, avião hein kedas fila mai rai boot. Sr. Vice-Ministro, oinsá bele haree mós viagem avião Aero Dili ne'e iha tinan foun ida-ne'e, 2025 ne'e, la'ós halai Oe-Cusse Díli no Díli Oe-Cusse de'it, maibé tem que semo ba Suai, Díli, Suai, Oe-Cusse, selae aeroporto Suai ho naran ne'ebé boot tebes ne'e hela naran de'it, tanba avião Aero Dili semo loron rua, sexta no segunda de'it, no sexta e segunda ne'e semo ba sira-ne'ebé serbisu iha Oe-Cusse maibé hela iha Díli, sexta fila mai Díli e segunda bá serbisu fali iha Oe-Cusse. Ida-ne'e mak realidade tanba hapara ona avião ZEESM Timor-Leste, ne'ebé halo operação segunda to'o sábadu, povo hotu aproveita no hatama receita lubuk ida ona ba iha-ne'e, do que subsídio ita selu saugati maibé semo de'it loron rua, sexta ho segunda de'it.

Ho ida-ne'e, ha'u hakarak hato'o, foin lailais evento ne'ebé autoridade RAEOA halo, consegue convida nação vizinha Indonésia mai hodi participa evento sira hanesan *Road Race*, desporto, kuda halai, feira barato, evento sira seluk iha Oe-Cusse, maibé, triste tebes – ha'u la hatene ida ne'e loos ka lae, Sr. Vice-Ministro precisa haree filafali no clarifica – ita, quando halo evento mak osan la iha,

lalika halo! Sá evento ida mak ita bá empresta fali ema seluk ida nia osan hodi selu ba manan-na'in sira, premiado sira, ne'ebé selu metade. Depois, iha informação dehan katak hein tinan foun ida-ne'e mak sei selu tan, susar tebes! Ita halo moe de'it.

Quando husi nação vizinha sira ne'ebé sai manán-na'in, preocupa boot, osan iha ka lae. Evento ne'e hala'o duni loloos ka lae? Ida-ne'e realidade.

No ha'u hakarak hateten iha-ne'e katak Presidente Autoridade la'o ketaketak, nem envolve tan ho secretário regional sira. Comissão organizadora quase mai husi rai-boot, aliás Díli, então la envolve Oe-Cusse oan. Ida-ne'e mak realidade duni, Oe-Cusse oan sai *penonton* duni, ne'ebé uluk liu hakilar-hakilar maibé ida-ne'e mak sai realidade duni.

Ha'u husu ba Sr. Vice-Ministro bele halo clarificação ba ida-ne'e.

Obrigada barak.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado Francisco da Costa Ikulay.

Se faz favor.

Sr. **Francisco da Costa «Ikulay»** (CNRT): — Bom dia, Presidente em exercício, Vice-Ministro dos Assuntos Parlamentares, distinto Deputado sira.

Primeiro, ha'u hakarak hato'o ha'u-nia bom Ano 2025. Tanba graça Maromak nian, ita hotu, liuliu Deputado na'in-65, bele hakat mai iha tinan 2025, ne'e graça boot ida. Tanbasá mak ha'u hatete hanesan ne'e? Ita-nia maluk lubuk ida iha ita-nia uma sorin-sorin mós ida-idak lakon iha ita-nia leet. Parabéns ba ita.

Segundo, ha'u hakarak hateten de'it, colega sira, hakarak husu de'it ba IX Governo, liuliu Ministério da Solidariedade Social, precisa atenção urgente ka máxima atu identifica povo timoroan sira ne'ebé hetan desastres naturais, anin sobu uma, tanba rai halai, balu hetan incêndio ka uma ahi han. Hanesan iha Município Baucau, Posto Venilale, acontece ida mós iha ne'ebá. Ponto sira hanesan ne'e ita tem que tau importância para bele halo atendimento urgente duni.

Evicção, colega Deputado balu dehan, ho ditadura hodi duni-sai, ha'u concorda ho Deputado balu nia hanoin katak cidadão hotu iha direito ba rai pedaço ida, ne'e Ita-Boot sira liga ba regras ne'ebé menciona ka hatete iha Constituição da República, concorda! Mas, colega sira, concorda mós ho Ita-Boot sira-nia liafuan katak ita, quando fó informação ida, tem que loos no baseia ba regras, labele dulas loos sai sala no sala sai fali loos.

Tanba sá mak ha'u hatete hanesan ne'e? Regras mak dehan: Labele halo uma iha espaço público! Labele ocupa espaço público! Labele hela iha fatin ne'ebé risco, labele hela iha fatin ne'ebé fó risco ba ó-nia vida! Labele usa buat ne'ebé la pertence ba pessoal ida ka grupo ida! Ida-ne'ebé merece ema

hotu nian, ida-ne'e ita, pessoal ka, líder ka comunidade mós tem que respeita, katak ida ne'ebé mak ha'u-nia direito no ida-ne'ebé mak ema seluk nia direito, ida-ne'ebé mak ema hotu nia direito. Se ita fó informação ida hanesan ne'e, significa ita mós hola parte atu halo desastre ba ita-nia povo rasik, que ita la fó informação ida-ne'ebé clara ba ita-nia povo. Husik sira hela nafatin, depois ita ko'alia fó oportunidade ba ema seluk atu ba ocupa tan, ida-ne'ebé la iha direito iha-ne'ebá. Ita iha direito ba ida-ne'ebé ema hotu nia direito.

Se hanesan ne'e, ita hotu rame-rame bá halo uma iha rai mamuk sira iha tasi-ninin ne'e ita bele halo de'it ona ba, rai Estado sira-ne'ebé iha tesik ba ne'e ita iha osan karik, ita bele halo.

Maibé, respeita ba sira-nia lian mós, oposição nia lian, favor ida ita considera liafuan ida ka rua iha-ne'ebá. Tanba ne'e husu ba Estado, é preciso atenção máxima, que sira ne'ebé balu ita haruka sai merece, tem que fó atenção duni.

Maibé, labele fó informação ida que sente ema hotu iha direito, liberdade ida-ne'e, democracia ida-ne'e espaço público ne'ebé la merece fa'an modo mós ita ba fa'an modo iha-ne'ebá. Depois, ita mai defende, ema halo atuação ita defende, dehan ne'e loos. Maromak! Ita hanoin de'it mak hakarak ema fó votos ba ita, mas interesse comum ne'e ita haluha lakon tiha, depois ita dulas liafuan ne'e tun sa'e de'it. *Okay*, tanba ema político, dulas ba mas povo barak assiste hela ita-nia liafuan ne'e. Ida-rua ne'ebé halo no hetan evicção ne'e claro que la concorda ona, mas maioria ne'e dehan katak desenvolvimento ne'e tem que la'o duni, maioria! Ita hotu, oan sira, bei oan sira, aproveita Nação ida ne'e nia di'ak ba futuro! Be Ita-Boot sira ba ukun karik, Ita-Boot sira atu halo saida ne'e? Depois, ema halo desenvolvimento, dehan la di'ak fali. 2028, Ita-Boot sira bá ukun, lalika halo bá! Husik ba estrada mós sai mercado, espaço público mós, à vontade, husik ema halo bá. Hein 2028 mak Ita-Boot sira ukun ba mak halo hanesan ne'e, husik no fó oportunidade buat ne'ebé di'ak sira halo bá, di'ak mós ba ita hotu, ba ita-nia oan no bei-oan sira hotu.

Obrigado barak, Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Tuirmai, Distinta Deputada Verónica Fernandes.

Se faz favor.

Sr.<sup>a</sup> **Verónica Fernandes** (FRETILIN): — Obrigada, Sr.<sup>a</sup> Presidente em exercício.

Ha'u-nia bom dia ba Sr.<sup>a</sup> Presidente em exercício ho componente da Mesa, bom dia ba maluk Deputado sira, ba povo doben Timor-Leste, e ha'u-nia continuação bom Ano Novo 2025 ba povo doben Timor-Leste no mós ba ita hotu.

Iha-ne'e ha'u hakarak reforça declaração política Bancada FRETILIN ninian, ne'ebé preocupa ho situação cruel ne'ebé ohin loron ita-nia povo, ita-nia maluk comunidade sira, ne'ebé hela iha Fomento



II, frequenta. Ita hanoin, desenvolvimento ne'e balu interpreta katak ne'e mak halo desenvolvimento físico ho uma andar 10, halo jardim ne'ebé furak, maibé haluha katak desenvolvimento loloos mak povo nia prosperidade, povo ne'ebé hetan moris digno iha nia rain rasik, povo ne'ebé moris justo iha nia rain rasik.

Iha Timor-Leste, ita-nia situação ohin loron contrária duni, povo ida-ne'ebé ita dehan sai centro ba desenvolvimento, sofre fali ba desenvolvimento ne'ebé nia ukun-na'in sira implementa horas ne'e daudauk iha IX Governo ida-ne'e, tanba ita haree, povo sira-ne'ebé lakon sira-nia uma, la'ós lakon de'it uma maibé lakon mós sira-nia esperança. Governo destrói mós sira-nia moris tanba ó hanoin katak atu muda sai sira husi fatin ne'ebá para bele salva sira husi desastre, maibé ida-ne'e la'ós salva sira husi desastre, ne'e destrói sira-nia moris. La hatene loos sira atu bá hela iha-ne'ebé, ohin loron.

Ne'e hanesan prática ne'ebé Ita-Boot sira hatudu ona ba maluk afetado sira iha Bidau Santana ne'ebá, to'o ohin loron balu sei hela iha vizinho sira, balu halo esforço nafatin buka osan oinsá hela nafatin iha *kos*. Inan ida-ne'ebé horibainhira Ita-Boot sira hasai iha tempo udan ho bebé kosokoan, to'o ohin loron sei nafatin hela ho madre ISMAIK (Instituto Secular Maun-Alin Iha Kristu) sira iha Kuluhun ne'ebá. Ida-ne'e situação ida-ne'e mak lamentável tebes.

Até que ema nia animal, ema nia sasán sira ne'ebé tuir loloos bele usa, autoridade bá estraga hotu. Situação hanesan mós agora acontece ba ita-nia maluk sira iha Fomento II.

Ita haree informação ka vídeo ida *viral*, iha-ne'ebé inan ida iha oan na'in-neen dehan: «ha'u loroloron fa'an sasán mak sustenta ha'u-nia oan sira», agora la hatene loos nia hetan rendimento husi ne'ebé atubele sustenta ninia oan sira. Ida-ne'e sai preocupação ba ita hotu.

Tanba Governo ida-ne'e iha capacidade, usa força bá dudu ka duni ninia ema sira, maibé la iha kbiit atu tau nia ema sira iha fatin digno. Até que ita-nia maluk sira ne'ebé afetado, sira dehan: «ami la contra desenvolvimento, ami la contra cidade Díli ne'e atu sai furak, maibé pelo menos cria netik condição ba ami, hatudu netik fatin ida ba ami katak ami hela tiha iha fatin ne'e, depois mak imi sobu». Maibé realidade la hanesan ne'e, aat liután sobu ka estraga povo ida-ne'e ninia hela-fatin iha tempo udan. Ida-ne'e atuação desumana. Ne'ebe, ha'u hanoin, Governo ida-ne'e precisa haree didi'ak.

Ohin loron ita ko'alia ka critica SEATOU, sim, SEATOU mak implementa serbisu ida-ne'e, maibé nia Chefe do Governo mak Sr. Primeiro-Ministro, Xanana Gusmão. Ha'u hanoin, Sr. Primeiro-Ministro ko'alia, SEATOU bele pára tanba Sr. Primeiro-Ministro, ita hotu hatene, quando iha atuação sira ne'ebé povo ki'ik sira enfrenta iha VIII Governo, nia sempre bá sai primeira linha hodi defende povo, ne'ebe, Estado tem que haree povo. Agora daudauk ida-ne'e mak acontece ba ita-nia maluk vulnerável sira iha Fomento II ne'ebá.

Quando situação ida-ne'e acontece, vítima liu mak ita-nia labarik sira, feto sira mak sai vítima, agora la hatene labarik sira-ne'e atu bá hela iha-ne'ebé para hala'o sira-nia estudo, inan isin-rua sira-nia condição bá oin ne'e oinsá.

Ne'ebe, favor ida, precisa cria condição ba sira molok hasai sira iha situação ida-ne'e, selae mak kiak no mukit Governo mak sei contribui hodi aumenta número kiak no mukit iha Timor-Leste.

Sr. Presidente da República mós lamenta ho atuação ida-ne'e, maibé, ha'u hanoin, Sr. Presidente da República mós semana-semana sempre halo reunião regular ho Sr. Primeiro-Ministro, di'ak liu informa ba Sr. Primeiro-Ministro para bele husu ba nia membro do Governo sira hadi'a mecanismo ba atuação ida-ne'e. Labele ko'alia de'it, maibé na realidade membro do Governo sira la halo tuir. Ne'e hanesan de'it.

Ha'u-nia intervenção mak ne'e de'it.

Obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

A seguir ou ikusliu, distinto Deputado Manuel Noronha.

Se faz favor.

Sr. **Manuel Henrique Noronha** (PD): — Di'ak, obrigado ba oportunidade.

Ha'u-nia respeito ba Lou Vice-Presidente do Parlamento Nacional, composição da Mesa, Vice-Ministro dos Assuntos Parlamentares, Lou no Na'i Deputado sira hotu, povo no mídia tomak, bom dia ba ita hotu.

Antes de ida-ne'e, lori Bancada Partido Democrático, hato'o ami-nia feliz Tinan Foun ba ita hotu, ba povo iha Timor laran tomak, espera 2025 bele lori ita ba moris ne'ebé di'ak, iha paz no prosperidade.

Iha-ne'e ha'u iha assunto oan ida atu hato'o iha Uma-Fukun ida-ne'e.

Primeiro, atu ko'alia uitoan de'it, ha'u lori ema nia *pribahasa* ne'ebé ita hotu hatene, hanesan «*buah simalakama, Papa makan mati, tidak makan pun ibu mati*», ida-ne'e mak SEATOU hasoru, SEATOU sobu, sala, la sobu mós sala. Maibé ita espera katak IX Governo sei la tau hela buat aat balu ba ita-nia povo no sei la lori povo ne'e ba aat. IX Governo iha intenção ne'ebé di'ak ba futuro atu lori povo ida-ne'e ba moris ne'ebé di'ak.

Ha'u hasoru problema ida, ne'e mak iha Manufahi, quando dia 26 de dezembro, ha'u bá Betano, ha'u fila, ponte ida iha Suco Babulu, Aldeia Turon, iha estrada pública ne'ebé facilita ita-nia povo no paciente sira lori bá-mai, ponte ne'e kotu quase besik tinan ida ona, maibé seidakau tau prioridade hodi halo construção.

Husu ba Vice-Ministro atu encaminha hela informação ida-ne'e ba IX Governo, liuliu ba Ministério das Obras Públicas, atubele tau prioridade ba ponte ida-ne'e tanba ponte ida-ne'e facilita ita-nia povo, ita-nia comunidade e nune'e mós paciente ne'ebé bele ultrapassa husi ponte ida-ne'e ba hospital iha Luak e nune'e mós bele transporta ita-nia paciente sira husi Luak mai Maubisse, to'o Díli.

Ida tan, ha'u halo comparação ba ponte rua, ida iha Kasnafar, ponte ne'ebé boot tebetebes, maibé halo la to'o tinan ida, e ponte ida iha Abatu, Suco Letefoho ne'ebé iha estrada pública ne'e, quase tinan ida ona seidauk hotu. Razão saida?

Ida-ne'e mak hato'o hela iha fatin ida-ne'e atu Vice-Ministro bele hato'o hela ba Ministro das Obras Públicas hodi haree to'ok ponte ida-ne'e tanba kleur tebes seidauk hotu. Nune'e mós, construção ponte ida-ne'e fó impacto hela ba comunidade ida-ne'ebé hela iha ponte nia rohan ne'e, quase taka tiha dalan tomak ba comunidade ida-ne'e e sira suspira tebes. Quando ponte ida-ne'e hotu, nia dalan à rasca loos, tanba ne'e mak, bele halo coordenação di'ak para bele facilita mós dalan oan ida ba comunidade ne'ebé hela iha área ida-ne'e.

Ha'u sente, husi ha'u mak ida-ne'e de'it.

Obrigado barak.

**Sr.<sup>a</sup> Presidente** (Maria Terezinha da Silva Viegas): — Muito obrigada, distinto Deputado.

Ohin iha declaração política, karik Deputado la usa ona nia tempo, ha'u bele continua.

Faz favor.

**Sr. Aniceto Longuinhos Guterres Lopes** (FRETILIN): — Obrigado, Sr.<sup>a</sup> Presidente em exercício.

Atu sublinha de'it, FRETILIN concorda katak cidade capital Díli tem que hadi'a duni, tem que ordena, maibé ordena ka hadi'a ho plano e programa.

Se ko'alia plano ho programa, uluk I Governo to'o III Governo rai hela tiha ona plano ordenamento ba cidade Díli, maibé hahú kedas IV Governo plano ne'e la funciona, hatama tiha iha gaveta.

E depois, tanba crise 2006, ema mai ida-idak ocupa fatin sira sem ordenamento. Quando ema bá hela iha fatin ne'ebé loloos labele hela, ita ukun sira-ne'e la iha autoridade atu dehan labele halo uma iha-ne'ebá, avisa! La avisa. La avisa e depois ita usa populismo dehan, «povo atu moris iha-ne'ebé se ita duni?». Uluk hanesan ne'e, mas agora populismo la iha ona.

Tanba ne'e, se ita duni de'it hanesan ne'e sem programa, hasai de'it hanesan ne'e sem plano, ne'e ita la resolve problema ida. Ita dudu malu, hasai balu husi ne'ebé bá ne'ebé, ita la resolve problema ida.

E, tem que revê mós ita-nia estratégia desenvolvimento. Quando iha ona programa no plano, iha implementação implementa tem que ho sentido humano, tanba ita ema mak ukun. Ukun ema tem que ho sentido humano, katak precisa cria condição humana adequada antes de muda ema husi nia hela-fatin, porque selae ida-ne'e ita dehan ita la'ós ema ona, maibé bele mosu tan acusação hanesan agora daudauk ne'e, violação direitos humanos mós.

Condição tem que iha! Se ita iha osan para halo festa, tiro foguete, fakar de'it, fakar de'it hanesan ne'e osan iha, nu'usá para cria condição ba ema kiak sira ita la iha osan?

Povo labele sai vítima tanba Governo sira ne'ebé ukun ne'e falha iha estratégia desenvolvimento no falha sistematicamente atu halo ordenamento ba cidade Díli ne'e! Povo labele sai vítima tanba falha ne'e, labele usa poder ka força atu muda ema, maibé tem que fó condição.

Problema mak ida-ne'e, nia causa: tanbasá mak ema mai hotu iha Díli atu buka moris? Ita ukun ne'e ita tem que hatene causa ne'e e resolve problema ida-ne'e mós.

Se masin-midar butuk de'it iha cidade Díli, nehek husi fatin hotu-hotu mai hotu buka masin-midar iha Díli. Tanba ne'e, se ita hakarak muda, tem que kari masin-midar fora de Díli atu nune'e nehek dispersa an rasik, la precisa ita obriga hasai. Liafuan português ne'e uluk VII Governo liderado husi Primeiro-Ministro Mari Alkatiri mai ho programa ida dehan «levar a cidade para o campo», katak tem que cria polos de desenvolvimento. E, momento ne'e, programa ida-ne'ebé VII Governo apresenta ne'e atu cria polos de desenvolvimento iha Baucau, iha Same, iha Maliana para labele hotu-hotu mai concentra hotu iha Díli, ne'e mak dehan cria polos de desenvolvimento.

Ida-ne'e mak ita dehan desenvolvimento ne'e hahú husi base, la'ós husi Díli mak bá. Maibé infelizmente Programa VII Governo ne'e Parlamento ida-ne'e mak vota contra, inclui partido boot CNRT.

Obrigado, Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada.

Iha ponto de ordem, maibé ha'u la fó ona tanba tempo ha'u fó kedas ba Sr. Vice-Ministro atu fó resposta ba questão sira-ne'ebé ohin Deputado sira foti.

Ba Ita-Boot ami fó tempo 20 minutos.

Se faz favor.

Sr. **Vice-Ministro dos Assuntos Parlamentares** (Adérito Hugo da Costa): — Obrigado ba Ex.<sup>ma</sup> Sr.<sup>a</sup> Presidente do Parlamento Nacional em exercício, membro da Mesa, distinto Deputado sira hotu.

Continuação feliz Natal e bom Ano 2025 nian ba Excelência sira hotu.

Ha'u koko atu hahú ho fó resposta ba declaração política Bancada FRETILIN nian liga ho evicção forçada ou evicção ne'ebé Governo halo ba população sira iha mota-ibun Comoro nian.

Ha'u hakarak adianta de'it, resposta balu ohin Sua Excelência Deputado sira hotu fó ona, maibé, em nome do Governo, ha'u hakarak hato'o katak antes halo atuação loron hirak liubá, notificação ba comunidade sira-ne'e desde setembro 2023, notificação.

E, Excelência sira bele haree iha uma sira-ne'e, tau número identificação ne'ebé notifica sira atu hamamuk ho razões hotu-hotu. Horas ne'e execução no notificação ida desde julho ho agosto 2023 ne'e halo daudauk ona atuação.

Notificação ho intenção atu sira voluntariamente hamamuk fatin ka espaço ne'e, tan ne'e mak ho udan boot, inundaçãõ ida semana kotuk, la'ós de'it tanba inundaçãõ ka mota tun ne'e, maibé mós tanba notificação ida ultrapassa tiha ona tempo.

Se ita kaer regime sira ohin Sr. Deputado sira temi, notificação ne'e 30 dias. Notificação 30 dias ne'e mak ita iha experiênciã passada sira, Sr. Deputado sira hatene, Ministério da Justiça halo atuaçãõ ba ocupante sira iha eis *Hotel Regende*. Ne'e mós ema rihun, ne'e 30 dias notificação.

Regime ida-ne'e mós mak usa hodi halo notificação ba ocupante uma sira seluk hanesan residênciã Sr. Mário Carrascalão nia iha Motael, iha Farol, ne'e regime sira-ne'e mak ita kaer hodi halo atuaçãõ.

Ba caso especial hanesan ocupante sira iha fatin sira ne'ebé iha mota-ibun, ou iha Indonésia, ita sei lembra karik, ema bolu *DAS (Daerah aliran sungai)*, iha-ne'ebá proibido atu ema hela, iha de'it espaço ema bolu espaço verde. Ne'e mos regra iha.

Iha tempo ocupaçãõ Indonésia nian fatin sira-ne'e proibido, la iha duni ema hela e labele hela. Ohin loron executa ona numeraçãõ sira ne'ebé SEATOU, MAE tau iha comunidade sira iha mota-ibun Comoro, se Sr. Deputado sira haree karik, iha tasi-ibun Comoro nian sa'e mai mós numeraçãõ tau hotu ona, inclui sira ne'ebé hela iha mota-ibun Aitarak-Laran nian, Mota Maloa to'o tasi-ibun besik residênciã Sua Excelênciã ex-Presidente da República ninia sorin, ne'e mós número tau hotu ona, medidas e notificação antecipadas ba ocupante sira atubele voluntariamente muda. Rejeita, lakohi karik, halo recurso! Ne'e mak mecanismo regime ne'ebé prevalece hela ba ita. Se tau tiha número, notifica tiha e ocupante la usa regime ne'e hodi halo recurso, ne'e culpa sé nian? Satán ita la'ós hela iha rai ne'ebé apropriado hanesan ita-nian ou, aat liu, ocupante sira-ne'e simu rai ne'e husi ocupante ida seluk fali.

Ha'u la precisa hatete sé-sé mak domina iha ocupaçãõ rai sira-ne'e para depois fó fali arrendamento ba comunidade sira. Barak husi sira ne'ebé ocupa ne'e la'ós na'in, halo arrendamento ba ema seluk. Ema seluk ne'e, bele ocupa fatin lubuk ida, nia bele halo uma lubuk ida, depois fó aluga. Dados iha!

Mas, ha'u concorda ho declaraçãõ política Sr. Deputado Bancada FRETILIN nian atu halo tipo de interpelaçãõ, ha'u concorda medidas ida-ne'e para labele ha'u mak resposta em nome sira beibeik, maibé Parlamento Nacional bele halo interpelaçãõ. Para mais detalhe, Sr. Deputado ko'alia ho governante sira no ha'u-nia colega sira ne'ebé kaer assunto ne'e. Dalan mais apropriado, ha'u sente mak ida-ne'e tanba discussãõ ba ida-ne'e kleur.

Ohin, liga mós ba evicçãõ sira liu ona, hanesan iha *Pasar Senggol* nian, iha Santana ho fatin seluseluk tan ne'ebé la acompanha ho tipo de incentivo ka subsídio ruma ba sira, balu iha, balu executa ona, karik balu seidauk iha, Sr. Deputado sira aproveita iha interpelaçãõ ne'e bele litik ha'u-nia colega membro Governo competente ba assunto ida-ne'e. Portanto, ba declaraçãõ política, provisoriamente ha'u adianta ha'u-nia resposta hanesan ohin ha'u dehan ona, Governo concorda atu

dalan interpelação mais apropriado para discussão kle'an liu ba assunto ne'ebé liga ho povo nia vida, povo nia moris.

Kona-ba Sr.<sup>a</sup> Deputada Cedelízia nian, ha'u hakarak fó resposta, decreto ba execução Orçamento 2025 nian entra em vigor ona, promulga ona antes dia 1 de janeiro e, ohin duni, loraik ida-ne'e convocatório husi Ministério das Finanças halo ona ba «linha ministerial» sira hotu atu mai reunião iha Ministério das Finanças hodi bele halo ona abertura ba sistema, nune'e execução bele hahú daudauk ona.

Dala ida tan, ba preocupação Sr.<sup>a</sup> Deputada Cedelízia nian ha'u hakarak adianta katak progresso mak ida-ne'e, Governo fó resposta ba recomendação Comissão C Parlamento Nacional nian iha Lei Orçamento 2025 nian atu adianta mais cedo possível decreto de execução, ami fó resposta katak decreto execução halo kedas antes férias Ano Novo nian, e ohin duni, 2h00 loraik ne'e, iha reunião iha Ministério das Finanças convoca ona ba diretor-geral, diretor nacional, entidade sira direta, indireta Estado atu bá reunião ida-ne'e hodi oficializa abertura ba sistema ba execução Orçamento 2025 nian.

Kona-ba escola iha Viqueque, escola secundária filial, ha'u bele regista ida-ne'e, escola filial lubuk ida, antes fim do ano 2024 ne'e Ministério da Educação, depois de halo levantamento, decide taka. Maibé, ha'u labele explica antecipadamente posição ministério nian ba assunto ida-ne'e, tanba ha'u mós regista assunto hanesan acontece iha escola secundária filial ida iha suco ida isolado loos, naran Fahinehan, iha Posto Fatuberliu, ne'ebé acomoda estudante sira husi Suco Horana, Turiscail nian no suco rua, Fahinehan ho Bubususu, circular Ministro da Educação nian ba tiha ona e taka. Povo lamenta tebetebes tanba sira-nia oan husi suco tolu ne'e tem que bá Turiscail para escola iha secundária, ou tun ba Same ou liu ba Fatuberliu.

Ha'u fiar katak caso ne'ebé acontece iha Viqueque hanesan mós ida-ne'e, tanba ne'e mak ha'u recomenda atu comissão especializada bele bolu Ministra ou Secretário de Estado para bele explica mais detalhada razão saida mak bele taka escola filial sira-ne'e. Ha'u fiar katak karik sira iha referência ou informação ruma mais detalhada ba assunto ne'ebé ohin ha'u dehan ona, katak preocupante tebetebes ba população sira ne'ebé nia oan conta ona ho existência escola filial ida-ne'e, maka iha plano ba sira-nia continuação estudo sira-nia oan nian. Mas, de repente hapara iha último ano, família sira tem que buka fatin atu acomoda nia oan sira atu continua escola secundária, escola secundária de'it, la'ós universidade.

Ne'ebe, obrigado ba Sr. Deputado nia observação, informação, ha'u sei adianta ba ministério ou, karik di'ak liu, ba comissão especializada sira bele halo audiência ho ministério sira.

Kona-ba resto eletricidade ne'ebé seidauk tama, seidauk halo conexão iha fatin barak, inclui ohin Sr. Deputado Marcos Martins nian kona-ba suco ida iha Ermera, ha'u sei adianta ba Sr. Ministro ho Secretário de Estado da Eletricidade atubele haree assunto ida-ne'e.

No mós, liga ba ponte hirak ne'e sobu tiha, ne'e la'ós problema foun, informação ne'e Sr. Deputado sira foti, ha'u envia ona ba Ministério atu fó resposta, ohin mós ha'u atualiza ona ba Ministério das Obras Públicas atu haree questão ida-ne'e ho sério quando ita hasoru hela situação ida inundaçõo barabarak iha última semana.

Kona-ba obra iha Hera, ohin Sr.<sup>a</sup> Deputado Olinda foti, Deputado Agio Ferreira mós foti, kona-ba construção ba normalizaçõo mota iha Hera nian, iha situaçõo hanesan inundaçõo, obra lubuk ida iha Hera mós Ministério das Obras Públicas halo «tenderizaçõo». Quando «tenderizaçõo» la'o hela e acontecimento mós ita haree rasik, tan ne'e mak informação ne'e importante loos ba Ministério das Obras Públicas atu adianta processo «tenderizaçõo» ne'ebé iha ou contrato ne'ebé celebra ona entre companhia sira atu Obras Públicas *monitor* companhia sira para implementa imediata obra sira-ne'e. Maioria husi obra sira-ne'e, liuliu estrada ou normalizaçõo ponte ne'e, tama hotu ona iha lista *tender* nian iha público. Sr. Deputado sira acompanha karik, antes fim do ano mós iha listagem lubuk ida ba obra sira-ne'e, e primeira semana janeiro nian mós, loron hirak liubá, hasai ona lista ba obra sira atu halo *tender*. Ne'e kona hotu ba fatin sira ne'ebé iha risco, hanesan ohin Sr. Deputado sira foti, inclui oinsá atu halo normalizaçõo ba mota Hera nian atu salva comunidade sira iha-ne'ebá, inclui Base Naval nian iha Hera.

Kona-ba celebraçõo evento nacional iha Oe-Cusse, Sr.<sup>a</sup> Deputada Sância Bano foti, ha'u regista ida-ne'e atubele recomenda ba colegas membros Governo relevantes, inclui RAEOA, atu haree experiênciã sira-ne'e ho didi'ak, nune'e Governo ka Estado labele comete menos de financiamento ba evento-evento sira ho carácter internacional ka regional, hodi labele hamonu ita-nia oin perante povo e mós visitante sira.

Kona-ba funcionamento Aeroporto Suai, Aeroporto Suai tau naran Kay Rala Xanana Gusmão, iha VII Governo mak tau naran ida-ne'e e Sr. Primeiro-Ministro, natoon iha debate orçamento hatete ho surpresa uitoan, la hatene história halo nu'ussá mak naran ne'e tau. Maibé, hakarak hatete katak aeroporto Suai parte ida hotu husi projeto Tasi Mane ho intençõo ba desenvolvimento indústria petróleo nian.

Antes *Covid-19*, operador ida iha tasi, mina nian, usa hela aeroporto ne'e ba movimento helicóptero sira-nian. Depois, mosu *Covid-19*, ho mós campo ida-ne'ebé sira interessado atu halo investimento la iha resultado positivo, maka companhia ne'e para tiha sira-nia movimento usa aeroporto Suai.

Ita iha esperança katak iha projeto Tasi Mane ne'ebé continua iha progresso, mesmo iha tasi laran no mós iha rai maran, aeroporto ida-ne'e ninia investimento sei la saugati tanba qualquer investidor no operador sira ba campo mina, iha tasi laran mós iha rai maran, ne'ebé la'o hela, iha expetativa bele atrai sira atubele sai operador ba campo mina sira-ne'e iha-ne'ebá.

Hanesan Sr. Deputado sira hatene, mina matan tolu mak iha ona processo exploração, hein de'it comercialização para depois bele usa ona facilidade sira-ne'e. Portanto, orientação, plano loloos ba aeroporto Suai ne'e mak ida, atu ba suporta atividade indústria petróleo nian iha costa sul. Portanto, investimento la saugati, naran mak halo surpresa ita hotu karik, ne'e VII Governo mak tau naran ida-ne'e ba sua Excelência Primeiro-Ministro atual nia naran.

Ha'u inteira ida-ne'e tanba uluk, iha 2017, inaugura aeroporto ida-ne'e ha'u hanesan Presidente Parlamento Nacional. Ha'u iha memoria institucional ba história, processo sira halo nu'usá tau naran ida-ne'e, tanba ha'u mós assiste lançamento e inauguração ne'e. Se husu karik, na'in lakohi, tanba la husu ida, nia hakfodak. Uluk ne'e Sr. Inácio Moreira mak Ministro, la hatene sala ne'e sé, na'in mak tau ou ema seluk mak hakarak tau naran ne'e.

Ponte ho carácter emergência ne'ebe la hotu, ha'u regista ida-ne'e, e iha informação adianta hela ba Sr. Deputado Manuel Noronha sobre Ponte Turon, iha informação tama dehan ponte ne'e husi nacional husu ba PAM atu halo atuação emergência hodi bele facilita transporte nafatin quando Ministério das Obras Públicas halo hela «tenderização», e tuir informação katak *tender* halo ona e companhia ne'ebe manán-na'in mós karik iha ona atubele halo continuação construção ba ponte Turon.

Sobre ponte Abatu ne'ebé halo antes ponte Kasnafar, ha'u sei adianta informação ne'e ba Ministério das Obras Públicas bele fó resposta. Mas, di'ak liután mós Comissão de Infraestruturas Parlamento Nacional nian bele halo audiência ho ministro para sira bele explica detalhada tanba problema barak loos, projeto ne'ebé tem que lança ba público para halo «tenderização» no mós continuação obra sira ne'ebé balu la'o ho di'ak, balu la'o ho lento, balu companhia sira, depois de manán, la bele hala'o, balu continuação obras ne'ebe Ministério das Obras Públicas acompanha hela ho Ministro do Planeamento e Investimento Estratégico, ba troço estrada sira ne'ebé celebra contrato desde Governo sira anterior hanesan atual projeto estrada Laga ba Baguia ne'ebé desde entrada IX Governo nian halo levantamento, halo observação para possibilidade atu continua ou lae. Maibé, posição Governo nian, Obras Públicas nian, haree katak fó nafatin oportunidade para sira completa. Mas, se la bele duni, Governo sei toma posição para depois bele continuação ba obra ne'e seja qual for companhia ida ne'ebé kaer ou sé-sé mak iha companhia ida-ne'e nia laran.

Kaer ba experiência ida-ne'e mós mak suspende hela obra rua, construção estrada iha Oe-Cusse, iha Ponte Noefefan nian ba leten, ho iha Mota Tono nian ba Oessilo, ne'ebé hapara hela. Ha'u explica ona parte balu iha reunião plenária anterior, horas ne'e daudauk Governo haree hela para depois bele fó continuação ba obra ne'e, no mós halo revisão ba contrato, se no caso contrato ne'e deteta iha problema ruma atu halo revisão.



Kona-ba gestão lixo, iha Plenária anterior ha'u fó resposta balu, mas, ha'u hanoin, horisehik ha'u simu ona, Deputado sira simu ona, explicação detalhada husi Ministério da Administração Estatal, iha Sr. Deputado sira-nia mesa leten, detalhe sobre gestão lixo nian iha Díli.

Liga mós ho companhia tolu, rua internacional ho ida nacional, ne'ebé envolve iha contrato ida longo prazo ba 10 anos ba gestão lixo ninian, explicação detalhada iha ona Sr. Deputado sira, maihusi Ministério Administração Estatal.

Sr.<sup>a</sup> Presidente Parlamento Nacional em exercício, ha'u hanoin, ha'u-nia resposta provisória mak ida-ne'e, ha'u sei adianta intervenção hotu-hotu ba colega membro Governo sira atu fó resposta.

Muito obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Vice-Ministro.

Ha'u hanoin, ho permissão Plenária nian, la necessário ba intervalo, ita continua de'it ita-nia voto de pesar ida-ne'e, molok ita atu bá intervalo ba almoço.

Karik, ho permissão Plenária nian, ha'u fó kedas ba Sr.<sup>a</sup> Secretária da Mesa halo leitura ba Voto de Pesar n.º 1/2025.

Se faz favor.

Sr.<sup>a</sup> **Secretária da Mesa** (Virgínia Ana Belo): — Obrigada, Sr.<sup>a</sup> Vice.

«Voto n.º 1/2025 – De Pesar pelo Falecimento de Tom Hyland

Faleceu, no dia 24 de dezembro de 2024, Tom Hyland, nascido em Dublin, Irlanda, a 12 de outubro de 1952.

Em 1992, Tom Hyland fundou, em Dublin, a *East Timor Ireland Solidarity Campaign*, com as funções de denunciar a ocupação ilegal de Timor-Leste pelas forças armadas indonésias, expor a cumplicidade dos governos ocidentais no apoio militar, diplomático e económico ao regime de Suharto na Indonésia e defender o respeito pelos direitos humanos, incluindo o direito à autodeterminação dos povos, conforme consagrado na Declaração Universal dos Direitos Humanos.

Entre 1994 e 1999, organizou inúmeras manifestações em Dublin e em várias cidades europeias em apoio à causa de Timor-Leste e prestou assistência crucial a ativistas timorenses que procuravam refúgio do regime opressivo indonésio, ajudando-os a obter asilo na Irlanda, em Portugal e no Reino Unido.

Após a independência de Timor-Leste, Tom Hyland continuou a contribuir para o desenvolvimento da nação timorense e para o desenvolvimento das suas relações internacionais, tendo desempenhado um papel fundamental na promoção de fortes laços bilaterais entre Timor-Leste e a Irlanda.

Foi apoiante ativo de várias iniciativas da sociedade civil, incluindo o Centro Audiovisual Max Stahl Timor-Leste, onde ajudou a preservar o património histórico e cultural da nação timorense. Tom

Hyland foi ainda cônsul honorário da Irlanda em Timor-Leste. À data da sua morte, desempenhava funções profissionais no Ministério dos Negócios Estrangeiros e Cooperação. Pelo seu inestimável contributo para a causa de Timor-Leste, Tom Hyland foi condecorado, a 30 de agosto de 2009, com a Medalha de Mérito, através do Decreto do Presidente da República n.º 24/2009, publicado no *Jornal da República*, Série I, n.º 32, de 9 de setembro do mesmo ano.

Assim, o Parlamento Nacional, reunido em sessão plenária, expressa o seu profundo pesar pelo falecimento de Tom Hyland, endereçando sentidas condolências à sua família e aos amigos enlutados.

O Deputado proponente, Duarte Nunes».

Obrigado, Presidente.

Sr.<sup>a</sup> **Presidente** (Maria Terezinha da Silva Viegas): — Ho nune'e, ha'u fó kedas ba proponente atubele justifica ninia proposta.

Faz favor.

Sr. **Duarte Nunes** (CNRT): — Obrigado, Presidente.

Timor-Leste, nação ida que hetan ukun an depois de luta 24 anos, ita hetan apoio husi ema barak, e senhor ne'e mós ida mak fó nia contribuição, e, depois de ita ukun an mós nia contribui nafatin, ne'ebe ita fó condecoração ba nia, nomeia nia hanesan cônsul honorário. Ida-ne'e parte husi nia apoio ba ita-nia ukun-an ne'e.

Ita precisa hatene e agradece ema sira ne'ebé fó ninia contribuição, tanba ne'e mak Sr. Tom Hyland nia contribuição ne'e boot tebes, ita-nia maluk barak que bá refugia iha Irlanda tanba ninia contribuição. Ita espera katak colega sira fó voto a favor ba ita-nia maluk sira ne'ebé hela iha-ne'ebá e ho nia contribuição no apoio, sira hetan moris ohin loron iha Irlanda ne'ebá no mós iha fatin seluk, hanesan Portugal no mós Inglaterra hotu.

Ha'u hanoin, nia biografia mak ne'e, data falecimento ne'e mak ha'u haree sira la tau, maibé dala ruma orsida, karik antes haruka ba imprensa, ita bele hadi'a tiha, tau mós nia data falecimento ne'e. Nia contribuição iha, mas data falecimento la iha, quando ema ne'e tanba nia falecimento mak ita fó ita-nia voto de pesar ne'e. Ida-ne'e de'it.

Obrigado, Presidente.

Sr.<sup>a</sup> **Presidente** (Maria Terezinha da Silva Viegas): — Ha'u loke ba apreciação, karik Bancada sira, maibé iha-ne'e iha distinta Deputada na'in-rua mak inscreve ona.

Ha'u fó kedas ba distinta Deputada Maria Angelina Sarmiento.

Faz favor.

Sr.<sup>a</sup> **Maria Angelina Lopes Sarmiento** (PLP): — Obrigada, Sr.<sup>a</sup> Presidente em exercício.

Ha'u hanoin, voto de pesar ida-ne'e ita merece fó ba saudoso Tom Hyland. Distinto Deputado Duarte, kona-ba data ne'e descreve kedas iha início, «Faleceu no dia 24 de dezembro de 2024», nia mate duni iha dia 24 de dezembro, se la sala iha dadeer-saan.

Sr. Tom Hyland, saudoso Tom Hyland, ita lakon amigo di'ak ida, amigo solidariedade di'ak ida, ne'ebé harii organização *East Timor Ireland Solidarity Campaign* ka ETISC e nia mós, depois de Massacre Santa Cruz, ema ne'ebé voz ativa iha Irlanda hodi ko'alia kona-ba Timor nia causa.

E que, mera coincidência, hahú iha 1999, ha'u rasik rona nia naran liuhosi Sr.<sup>a</sup> ida naran Finola Gill, hanesan representante Trócaire ka Caritas Irlanda nian, ne'ebé liuhosi organização ida Trócaire ho CAFOD (*Catholic Agency For Overseas Development*), sira mak iha kotuk apoia ita-nia saudoso hanesan Max Stahl no mós Tom Hyland iha Irlanda, hanesan organização católica ne'ebé mós indiretamente apoia ita-nia luta.

E hahú iha 1997 mai leten, Sr. Tom Hyland mós lori jornalista lubuk ida mai iha-ne'e hodi halo entrevista ba pessoal eminente sira, importante, iha ita-nian Rain, hodi sai hanesan evidência atu sira continua halo advocacia iha Europa ba Timor nia causa. Então, merece duni hetan reconhecimento husi Estado no mós Timor-Leste, liuliu Parlamento Nacional, atu fó voto de pesar ida-ne'e nu'udar sentido de gratidão e agradecimento ba saudoso ninia contribuição, la'ós de'it iha fase libertação da pátria, maibé iha libertação do povo depois de Timor hetan ukun-an, nia rasik decide atu hela permanentemente iha Timor no fó apoio iha Ministério dos Negócios Estrangeiros no mós ba, hanesan *fundraising*, buka apoio, ba Clínica Bairro-Pite liuhosi doutor Dan Murphy, e então ninia apoio ida-ne'e iha consistência ba libertação da pátria no mós libertação do povo. Nune'e, ami hein katak nia família sira bele simu consequência husi nia decisão ida ne'ebé nia foti atu hela iha Timor.

Nia sofre moras ne'ebé todan, iha ema balu hakarak apoia nia atu lori fila ba Irlanda atubele hetan tratamento, maibé tanba nia fuan fó laran tebes ba Timor, nia decide husik iis iha dia 24 de dezembro, husik hela hotu ita.

Hanesan história mós, ninia mãe mate iha dia 24 de dezembro, depois, liu semana ida, ninia pai mós mate, iha dia 31 de dezembro, e nia mós halo história hanesan husi ninia inan ho aman, hakarak ita hotu celebra ho nia iha 24 de dezembro, bainhira nia husik iis.

Ida-ne'e mak ha'u-nia intervenção e ami-nia sentido solidariedade boot ba família Timor-Leste ne'ebé lakon saudoso Tom Hyland nu'udar *campaigner* di'ak ida ba Timor-Leste nia luta.

Obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

A seguir, distinta Deputada Lídia Norberta.

Se faz favor.

Sr.<sup>a</sup> **Lídia Norberta dos Santos Martins** (FRETILIN): — Obrigada, Sr.<sup>a</sup> Presidente.

Ita tem que halo duni voto de pesar ida-ne'e ba Sr. Tom Hyland. Ami, hanesan funcionária uluk iha Ministério dos Negócios Estrangeiros ho Sr. Deputado António da Conceição, iha-ne'ebá ami sempre bolu nia naran Papa Tom – iha-ne'e mak ita hateten Tom Hyland – naran ida que conhecido ba hotu-hotu, tanba Papa Tom ne'e, além de contribui ba ita-nian Rain liuhosi apoio ne'ebé halo, manifestação sira ne'ebé nia halo iha Irlanda, apoia mós ita-nian maun sira ne'ebé halo asilo político ba iha Portugal to'o ikus balu halai ba Irlanda ho fatin sira seluk.

Nia mós iha papel ida que boot tebetebes iha era ukun-an nian iha Ministério dos Negócios Estrangeiros no mós ba iha alin balu ne'ebé, wainhira la iha kbiit atu continua sira-nia estudo, Papa Tom mós fó apoio. Ha'u hanoin katak ida-ne'e bele sai mós hanesan referência ida ba documento ida-ne'e, tanba iha alin barak ne'ebé escola, Papa Tom fó apoio barak tebetebes ba sira. Então, ba causa Timor nian ne'e nia hahú kedas ho luta de libertação nacional, maibé iha era independência nia contribui maka'as tebetebes ho, bele dehan katak isin ho klamar, sim, isin ho klamar duni, ba ita-nian Rain. Ne'ebe ami hanoin katak apoia ida-ne'e, maibé tem que tau mós kona-ba apoio ne'ebé nia fó ba alin sira ne'ebé continua sira-nia estudo, la iha kbiit maibé nia fó apoio.

Ha'u hanoin, mak ida-ne'e de'it, Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Ba distinto Deputado proponente, concorda ho nia conteúdo, karik distinta Deputada Lídia hakarak atu acrescenta tan parágrafo ida sobre Ita-Boot nia pronunciamento ne'e?

Ha'u husu ba distinto Deputado proponente, Deputado Duarte, karik la iha objeção, bele hadi'a antes ita haruka ba iha publicação.

Ho nune'e ita bele...

Sr. **Duarte Nunes** (CNRT): — Bele, bele, Sr.<sup>a</sup> Presidente! La iha problema.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Ho nune'e ita hotu-hotu concorda katak depois de ita vota, husu ba Deputada Lídia atu hamutuk ho funcionário DIPLÉN, hadi'a tiha nia redação ne'ebé ohin ita vota.

Ho nune'e ita hotu prepara ba vota ba Voto N.º 1/2025 – De Pesar pelo Falecimento de Tom Hyland.

Ba distinto Deputado sira ne'ebé vota a favor, contra, abstenção, faz favor.

*Deputado sira hala'o votação ordinária.*

Obrigada.

*Hato'ona ona votação ba Voto N.º 1/2025, no hetan ona aprovação ho voto a favor 49, contra 0 no abstenção 0.*

Ho nune'e, ita-nia Plenária ohin nian remata, ita intervalo ba almoço.

No mós, ba comissão sira, karik Deputada Cedelízia iha informação ruma atu hato'ona ho pedido ponto de ordem ne'ebé inscreve hela iha-ne'e? Karik liga ba Comissão C.

Se faz favor, ha'u fó um minuto.

Sr.<sup>a</sup> **Cedelízia Faria dos Santos** (CNRT): — Obrigada, Presidente.

Ha'u lailais de'it. Obrigada ba ohin Vice-Ministro nia explicação katak orsida loraik sei halo lançamento, ha'u la iha-ne'e maibé ha'u rona liuhosi rádio.

Maibé, ami fó sugestão de'it, se bele karik, tinan oin fó mós convite mai ami, Comissão C, ami na'in-sia bele ba participa, tanba papel Parlamento nian ne'e atu halo fiscalização.

Ida-ne'e de'it, obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada ba distinto Deputado sira hotu, ba Ita-Boot sira-nia contribuição, participação e paciência.

Boa tarde e bom almoço a todos.

Muito obrigada.

*Horas hatudu tuku 12 liu minuto 24*